

四庫全書

子部

欽定四庫全書

子部

玉海卷二十三

詳校官給事中<sub>臣</sub>查善長

主事<sub>臣</sub>祁韻士覆勘

總校官進士<sub>臣</sub>朱 鈐

校對官編修<sub>臣</sub>朱 攸

謄錄監生<sub>臣</sub>夏清和

欽定四庫全書

玉海卷二十三

宋 王應麟 撰

地理

陂塘堰湖 隄埭

自古賢智之士為其民捍患興利其遺跡往往而在  
使其繼者皆如始作之心則民到于今受其賜天下  
豈有遺利乎

舜五湖

後漢班固傳捐金於山沈珠於淵注陸賈新語舜弃黃

金於嶰巖之山捐珠於五湖之泉一作川以塞一作杜邪淫

之路一作欲淮南子舜乃使禹䟽三江五湖

禹五湖

墨子禹治天下南為江漢淮汝東流注之五湖淮南

子禹之時天下大水禹身執蘓禹以為民先剔河而導

九岐鑿江而通九路辟五湖而定東海管子夏人之

王鑿五湖 說苑云河間獻王曰禹鑿江通於九派醜

五湖而定東海

賈誼書云  
澄五湖

呂氏春秋禹通三江五湖

決伊闕溝廻陸注之東海因水之力也 史記太史公

曰上姑蘇望五湖正義五湖者連太湖在蘇州西四十

里

又曰游莫貢陵胥為五湖並太湖東岸五灣

索隱曰五湖者具區洮滬彭

蠡青草洞庭案張勅吳錄五湖者太湖之別名以其周

行五百餘里故曰五湖或說以太湖射貴湖上湖洮湖

滬湖為五湖案國語吳越戰于五湖直在笠澤一湖中

耳或說非也 貨殖傳吳有三江五湖之利 漢地理志周官揚州浸曰五湖注師古曰五湖在吳 越語興師伐吳至於五湖 禹貢震澤注吳太湖名䟽五湖即震澤 越絕書太湖周三萬六千頃 晉楊泉有五湖賦

周五湖

周禮職方氏揚州其浸五湖注在吳南 水經注南江東注于具區謂之五湖口五湖謂長塘湖太湖射貴湖上湖漚湖也郭景純江賦曰注五湖以漫漭言江水經緯

五湖苞注太湖也國語曰越伐吳戰於五湖范蠡返至五湖而辭越虞翻曰是湖有五道韋昭曰今太湖也尚書謂之震澤爾雅以為具區方員五百里山海經曰浮玉之山北望具區苕水出于其陰北流注于具區湖中有大雷小雷三山亦謂三山湖又謂洞庭湖楊修五湖賦曰頭首無錫足蹄松江負鳥程於背上懷大吳以當勾岵羅崔嵬穹隆紆曲大雷小雷湍波相逐言湖之苞極也庾仲初揚都賦注曰今太湖東注為松江下七十

里有水口分流東北入海為婁江東南入海為東江與  
松江而三 史河渠書於吳則通渠三江五湖注韋昭  
曰實一湖今太湖是也在吳西南

秦百丈堰

理道要訣秦以李冰為蜀郡太守造百丈堰灌田數千  
頃蜀以富饒

漢白馬津

史記酈生傳願急復進兵收取滎陽據敖倉之粟塞成



臯之險杜太行之道距蜚狐之口守白馬之津以示諸

侯形制之執

漢書同

戰國策張儀曰決白馬之口以流

魏氏高誘注白馬津名 水經注河過黎陽縣南為白

馬津石勒號為靈昌津

唐滑州黎陽津即此也今屬滑州白馬縣本衛之曹邑也

漢芍陂 楚期思陂

地理志六安國六縣有如谿水東北至壽春入芍陂

音芍

酌又音鵲

廬江郡濞縣有泚山泚水所出北至壽春入芍陂

淮南子孫叔敖決期思之水灌雩婁之野

汝南有期思縣雩婁

今廬江

意林孫叔敖作期思陂而荆土用贍 水經注

東北逕白芍亭東積而為湖謂之芍陂陂周一百二十  
許里在壽春縣南八十里言楚相孫叔敖所造魏王淩  
與吳將張休文戰於芍陂即此處也陂有五門吐納川  
流西北為香門陂水北逕叔敖祠下謂之芍陂瀆又北  
分為二水一水東注黎漿東注肥水 王景傳建初八  
年遷廬江太守先是百姓不知牛耕致地力有餘而食  
常不足郡界有楚相孫叔敖所起芍陂稻田景乃驅率

吏民修起蕪廢教用犂耕由是墾闢倍多境內豐給遂  
銘石刻誓令民知常禁又訓令蠶織為作法制皆著于  
鄉亭廬江傳其文辭注陂在今壽州安豐縣東孫叔敖  
所作期思陂是也徑百里灌田萬頃 魏志建安十四

年七月置揚州郡縣長吏開芍陂屯田

魏劉馥晉劉頌  
皆修治芍陂見

下 通典宋元嘉七年荆河刺史劉義欣鎮壽陽經理

芍陂良田萬頃有舊溝引淝水入陂齊垣崇祖修芍陂

田

通典又云崔實月令曰叔教  
作期思陂即此齊梁立屯田

隋趙軌傳芍陂舊有

五門堰軌更開三十六門灌田五千餘頃 輿地廣記  
壽州安豐有芍陂徑百里灌田萬頃

漢金隄

溝洫志漢興三十有九年孝文時河決酸東東潰金隄

注師古曰河隄名在東郡白馬津東郡大興卒塞之成帝初河決東郡

金隄建始四年秋大水鴻嘉四年河水溢溢孫禁圖方畧以為

可決平原金隄間開通大河至海哀帝初賈讓言今行  
上策徙冀州民決黎陽遮害亭放河使北入海河西薄

太山東薄金隄執不能遠云云臣竊按視遮害亭西十八里至淇水口廼有金隄高一丈自是東地稍下隄稍高至遮害亭高四五丈往五六歲河水大盛增丈七尺云云王尊傳為東郡太守河水盛溢泛浸瓠子金隄尊躬率吏民投沈白馬祀水神河伯尊親執圭璧使巫策祝請以身填金隄因止宿廬居隄上水波稍却迴還吏民嘉壯尊之勇節崔瑗河隄謁者箴伊昔鴻泉浩浩滔天有夏作空爰奠山川爰及周衰夏績陵遲導非

其導埋非其埤湓湓滂汨屢決金隄瓠子潺湲宣房作  
歌使臣司水敢告執河 括地志金隄一名千里隄在  
白馬縣東五里 九域志大名府有金隄漢志曰黎陽  
南故大金隄與東山相屬北盡魏界

又有縣隄博州有古金隄

輿

地記酸棗縣有金隄漢文時河決金隄即此 元和志

金隄在酸棗縣南二十三里

在今滑州界

漢河隄方畧

馮遂傳為都尉時言河隄方畧 溝洫志自塞宣防後

河復北決於館陶分爲屯氏河

地理志靈縣河水別出爲鳴犢河東北至藺入

屯氏河信成縣張甲河首受屯氏別河東因其自然不

北至藺入漳水館陶河水別出爲屯氏河

隄塞元帝永元五年河決清河靈鳴犢口而屯氏河絕

成帝初清河都尉馮遂奏言郡承河下流無大害者以

屯氏河通兩川分流也今屯氏河塞靈鳴犢口又益不

利獨一川兼受數河之任雖高增隄防終不能泄禹非

不愛民力以地形有勢故穿九河今既滅難明屯氏河

不流行七十餘年新絕未久其處易浚又其口所居高

於以分流殺水力道里便宜又地節時郭昌寧直渠後  
三歲河水更從故第二曲間北可六里復南合今其曲  
執復邪直貝丘百姓寒心宜復穿渠東行事下丞相御  
史白遣博士許商行視以為屯氏河盈溢所為用度不  
足可且勿浚後三歲

建始四年秋

河果決於館陶及東郡金

隄御史大夫尹忠對方略疏濶上切責之

十一月

河隄使

者王延世使塞以竹落長四丈大九圍盛以小石兩船  
夾載而下之三十六日河隄成以五年為河平元年

三月



以延世為光祿大夫秩中二千石賜爵關內侯黃金百斤後二歲河復決平原復遣

延世治之杜欽以為丞相史揚焉言延世受焉術且水  
執各異不博議利害而任一人如使不及今冬成來春  
桃花水盛必羨溢宜遣焉及將作大匠許商諫大夫乘  
馬延年雜作如欽言遣焉等作治六月廼成復賜延世  
黃金百斤後九歲鴻嘉四年楊焉言從河上下患底柱  
隘可鑄廣之上使焉鑄之水益湍怒害甚於故是歲秋  
勃海清河信都河水溢溢河隄都尉許商與丞相史孫

禁共行視圖方畧禁以為可決平原金隄間開通大河  
令入故篤馬河許商以為不可公卿皆從商言先是谷  
永以為河中國之經濟聖王興則出圖書王道廢則竭  
絕修政而應之災變自除時李尋解光亦言衆庶見王  
延世蒙重賞競言便巧不可用議者常欲求索九河故  
迹而穿之今因其自決可且勿塞以觀水勢遂止不塞  
哀帝初平當使領河隄奏言九河今皆寘滅按經義有  
決河深川無隄防雍塞宜博求能浚川疏河者舉吏民

莫有應書待詔賈讓言治河有上中下策治土而防其  
川猶止兒啼而塞其口隄防之作近起戰國雍防百川  
各以自利上策徙冀州民當水衝者不與水爭地中策  
多穿漕渠於冀州地使民得溉田分殺水怒通渠有三  
利民田適治河隄亦成下策繕全故隄增卑倍薄勞費  
無已王莽時召能治河者以百數其大畧異者關並言  
秦漢以來河決曹衛之域不過百八十里可空此地勿  
為官亭民室張戎言民皆引河渭山川水溉田春夏乾

燥故使河流遲貯淤而稍淺雨多水暴至則溢決可各  
順從其性毋復灌溉韓牧以為可畧於禹貢九河處穿  
之王橫言宜卻徙平處更開空使緣西山足乘高地而  
東北入海桓譚為司空掾典其議無施行者 李尋傳  
王根為大司馬時多災異根輔政數問尋尋以為且有  
洪水為災乃說根曰蓄水連泉務通利之修舊隄防省  
池澤稅以助損邪陰之盛 馮野王傳以故二千石使  
行河隄

漢浙江

山海經浙江出三天子都在其東在閩西北入海餘暨  
南注按地理志浙江出新安黟縣南蠻中東入海今錢  
唐浙江是也地理志丹陽郡黟縣漸江水出南蠻夷  
中東入海秦紀三十七年十一月渡海渚過丹陽至  
錢唐臨浙江水波惡乃西百二十里從狹中渡上會稽  
祭大禹望于南海注晉灼曰江水至會稽山陰為浙江  
唐六典浙江水有三源一出歙州一出衢州一出婺

州歷睦杭越三州界入海

漢射陽湖 梁湖 博支湖

地理志廣陵國江都有江水祠渠水首受江北至射陽入湖 郡國志廣陵郡射陽注有梁湖地道記曰有博支湖

漢六門陂 射陂 少府陂澤

見草田

水經注湍水又逕穰縣為六門陂漢南陽太守召信臣以建昭五年斷湍水立穰西石埭至元始五年更開三

門為六石門故號六門塢溉穰新野昆陽三縣五千餘  
頃晉太康三年鎮南將軍杜預復更開廣利加于民有  
六門碑部曲主安陽亭侯鄧達等以太康五年立廣  
陵王胥傳射陂草田

漢鉗盧陂

通典鄧州穰縣有六門堰鉗盧陂並漢邵信臣所作溉  
田三萬頃元帝建昭中邵信臣為南陽太守於穰縣  
南六十里造鉗盧陂累石為隄傍開六石門以節水勢

澤中有鉗盧玉池因以為名用廣溉灌歲增多至三萬

頃後杜詩為守復修其業時歌之曰前有邵父後有杜

母張衡南都賦其陂澤則有鉗盧玉池赭陽東陂

杜注

預表曰所領部曲皆居南鄉界所近鉗盧大陂下有良田玉池在宛貯水渟洿亘望無

涯其水則開竇灑流浸彼稻田溝澮脉連隄塍相轄朝

雲不興而潢潦獨臻決渫則曠為漑為陸冬稼夏穡隨

時代熟國史地理志鄧州穰縣有鉗盧陂

漢鴻郤陂



許楊傳汝南舊有鴻郤陂

在今豫州汝陽縣東

成帝時丞相翟方

進奏毀敗之建武中太守鄧晨欲修復其功聞楊曉水  
脉召與議之楊曰昔成帝用方進之言尋而自夢上天  
天帝怒曰何故敗我濯龍淵是後民失其利多致飢困  
時有歌謠曰敗我陂者翟子威飴我大豆亨我芋魁反  
乎覆陂當復昔大禹決江疏河以利天下明府今興立  
廢業富國安民童謠之言將有驗於此願以死効力晨  
大悅因以楊為都水掾使典其事楊因高下形勢起塘

四百餘里數年乃立百姓得其便 鄧晨傳為汝南太守建武十八年興鴻卻陂數千頃田汝土以殷魚稻之饒流行他郡 前翟方進傳汝南舊有鴻隙大陂郡以

為饒

師古曰鴻隙改名藉其溉灌及魚鼈葦蒲之利以多財用

成帝時關東數水陂

溢為害方進為相與御史大夫孔光共遣掾行視以為決去陂水其地肥美省隄防費而無水憂遂奏罷之及翟氏滅鄉里歸惡言方進請陂下良田不得而奏罷陂云王莽時常枯旱郡中追怨方進童謠曰壞陂誰翟子

威飯我豆食羹芋魁反乎覆陂當復誰云者兩

黃鵠

安帝紀永初三年三月癸巳詔以鴻

池

晉志作鴻陂

假與貧民

國史地理志蔡州汝陽

有鴻陂陂

晉張載有洪池陂銘

見池沼類

文選

注漢宮殿疏曰長安有鴈鵲陂承昆明下流

類聚云蓋

地六頃

漢樊陂

樊宏傳父重世善農稼開廣田土三百餘頃其所起廬

舍有陂渠灌注注鄴元水經注曰湖水支分東北為樊

氏陂至今猶名為樊陂在今鄧州新野縣之西南

贊謂樊重

分地以用天道

通典新野縣有樊陂在西南

### 漢武陵五溪

馬援傳建武二十四年武威將軍劉尚擊武陵五溪蠻

夷注鄴元注水經云武陵有五溪雄獠酉澠辰溪蠻夷

所居故謂五溪蠻土俗雄作熊獠作明澠作武在今辰

州界

漢蒲陽陂

後張禹傳元和三年遷下邳相徐縣北界有蒲陽陂

東觀

記曰陂水廣二十里徑百里在道西其東有田可萬頃陂與陂同

傍多良田而堙廢莫

修禹為開水門通引灌溉遂成熟田數百頃勸率吏民假與種糧親自勉勞遂大收穀實鄰郡貧者歸之千餘戶室廬相屬其下成市後歲至墾千餘頃民用饒給

漢蒲姑陂 長洲澤 玉池澤陂

郡國志下邳國取慮有蒲姑陂注左傳昭十六年齊師

至蒲隧杜預曰縣東有蒲姑陂 廣陵郡東陽有長洲  
澤吳王濞太倉在此 南陽郡宛縣注南都賦注曰有  
玉池澤陂

漢董池陂

郡國志河東郡聞喜邑有董池陂古董澤

漢三丈陂

見鮑陽渠 馬稜傳章和元年遷廣陵太守興復陂湖  
溉田二萬餘頃吏民刻石頌之注東觀記曰稜在廣陵

興復陂湖增歲租十萬餘斛

漢八激堤

水經河水又東逕八激堤北注漢安帝永初七年令謁者太山于岑於石門東積石八所皆如小山以捍衝波謂之八激堤

漢鑑湖

曹鞏序鑑湖一曰南湖

又曰鏡湖

南並山北屬州城漕渠東

西距江順帝永和五年會稽太守馬臻之所爲也築塘

周回三百里

一云三百五十八里  
通典云三百十里

溉田九千餘頃其北

隄石閘二陰溝十九南隄陰溝十四蓋因三江之上兩

山之間疏為二門以時視田之水小溢則縱其一大溢

盡縱之昔謝靈運求會稽回踵湖岬崕湖為田則請湖

為田越之俗舊矣然南湖繇漢接唐未嘗廢宋興民始

有盜湖為田者至治平間湖廢幾盡

熙寧二年冬作

唐賀知

章傳以宅為千秋觀求周宮湖數頃為放生池有詔賜

鏡湖剡川一曲

宋朝會要熙寧間命江行經度凡為



田者兩存之立石柱內為田外為湖政和中王仲巖遂廢湖為田隆興二年二月詔賀知章放生池舊界十八頃外餘縱民耕之宋孔靈符傳山陰縣土狹民多田少靈符表徙無貲之家於餘姚鄞鄮三縣界墾起湖田

漢當湖

郡國志吳郡海鹽注案今計偕簿縣之故治順帝時為湖今謂之當湖

漢青陂

水經注青陂廟前有陂漢建寧三年新蔡長李言上請復青陂在縣坤地源起桐栢淮川別流入于潺湲逕新息牆陂衍入襄信界灌溉五百餘頃

漢廣成澤

輿地廣記汝州梁縣西有廣成澤後漢作苑為游獵之地馬融作頌今日廣潤河蓋避朱梁諱也

唐事見講武

水

經注汝水東與廣成澤水合安帝永初元年以廣成游獵地假與貧民郡國志河南新城有廣成聚有廣成

苑通典廣成苑在縣西

魏芍陂

又見上

茹陂

魏志太祖表劉馥為揚州刺史鎮合肥數年恩化盛行百姓樂其政流民越江山而歸者以萬數於是廣屯田興治芍陂茹陂七門吳塘諸埭以溉稻田官民以是有蓄吳志赤烏四年四月遣全琮畧淮南決芍陂後漢志注皇覽曰楚大夫子思造芍陂

魏鄭陂

晉志

兼魏志本傳

魏文帝黃初中鄭渾為沛郡大守郡界下

濕患水潦百姓飢之渾於蕭相二縣界興陂遏

一作開塢

稻田郡人皆不以為便渾曰地勢洿下宜灌溉終有魚  
稻經久之利此豐民之本也乃躬率吏民興功一冬皆  
成比年大收頃畝歲增租入倍常民賴其利刻石頌之  
號曰鄭陂

魏精湖

蔣濟傳文帝幸廣陵濟表水道難通上三州論以諷不

從於是戰船數千皆滯不得行議者欲就留兵屯田濟  
以為東近湖北臨淮若水盛時賊易為寇不可安屯從  
之車駕即發還到精湖水稍盡留船付濟鑿池作四五  
道蹴船令聚豫作土豚遏斷湖水皆引後船一時開遏  
入淮中

魏臨晉陂

見成國渠

魏龍陂

見瑞物類 文帝於元武陂作詩

魏百尺堦

水經注沙水東南流注于潁謂之交口水次有大堰即古百尺堰也魏書司馬宣王討王凌大軍至百尺堦今俗呼為山陽堰非也蓋新水首受潁於百尺溝 元和志百尺堰在汝陰縣西北一百里

魏河內水利

水經注沁水南逕石門石門是晉安平獻王司馬孚之

為魏野王典農中郎將之所造也案其表云臣孚言臣  
被明詔興河內水利臣既到檢行沁水源出銅堤山屈  
曲周迴水道九百方石為門詔書聽許於是夾岸累石  
結以為門用代木門枋故石門舊有枋口之稱溉田頃  
畝之數間關歲月之功事見門側石銘 漢建安九年  
魏武王於淇水口下大枋木以成堰遏淇水東入白溝  
以通漕運時人號其處為枋頭是以盧諶賦曰洪枋巨  
堰深渠高隄

吳江陵堰 東興隄

陸抗傳初江陵平行道路通利抗敕江陵督張咸作大堰遏水漸積平中以絕寇叛羊祜欲因所遏水為船運糧揚聲將破堰以通步軍抗聞使咸亟破之祜至當陽聞堰敗乃改船以車運大費損功力 諸葛恪傳

初黃龍元年遷都建業二年築東興隄遏湖水後征淮南敗以內船由是廢不復修恪以建興元年十月會衆於東興更作大隄左右結山俠築兩城



各留千人守之魏作浮橋度軍於隄上分兵攻兩城  
軍散橋壞 魏王基傳江陵有沮漳二水溉灌膏  
腴之田以千數安陸左右陂池沃衍 晉志吳作  
浦里塘

晉芍陂

又見上

劉頌傳武帝時為淮南相甚有政績舊修芍陂年用數  
萬人豪強兼并孤貧失業頌使大小戮力計功受分百  
姓歌其平惠 伏滔正淮論壽春龍泉之陂良疇萬頃

晉巴丘湖

杜預傳都督荊州江漢懷德號曰杜父舊水道惟沔漢達江陵千數百里無通路又巴丘湖沅湘之會表裏山川實為險固荆蠻之所恃也預乃開楊口起夏水達巴陵千餘里內瀉長江之險外通零桂之漕南土歌之曰後世無叛由杜翁孰識智名與勇功後漢志注巴丘湖江南之雲夢也爾雅十藪楚有雲夢郭璞曰巴丘湖是也通典復州沔陽有夏水沔水岳州巴陵有巴丘

湖

晉沈萊堰

魏濟河論

又見河渠

傳祇傳武帝時為滎陽太守自魏黃初大水之後河濟汎溢鄧艾嘗著濟河論開石門而通之至是復壞祇乃造沉萊堰至今兗豫無水患百姓為立碑頌焉魏志劉靖都督河北修廣戾渠陵大竭水溉灌薊南北

晉二十九陂

水經注昔在晉世杜預繼信臣之業復六門之陂過六

門之水下結二十九陂諸陂散流咸入朝水事見六門碑  
通鑑桓溫至金鄉水道絕使毛虎生鑿鉅野三百里引汶水會於清水

晉洛陽千金竭

李矩傳為汝陰太守永嘉初

元年

與汝南太守袁孚脩洛

陽千金竭

音竭與堰  
鳩義同

以利漕運

紀云始修千金竭於許昌以通運  
劉曜攻石

生千金壩決千金竭以灌之

晉曲阿新豐塘

張闓傳元帝時晉陵內史在郡甚有威惠時所部四縣  
並以旱失田闓乃立曲阿新豐塘溉田八百餘頃每歲  
豐稔葛洪為頌計用二十一萬一千二十功以擅興造  
免官後以公卿言張闓興陂溉田可謂益國而反被黜  
帝感悟下詔以闓為大司農世說注引葛洪富民塘  
頌

晉句章堰 舊陂

孔愉傳為會稽內史句章縣有漢時舊陂毀廢數百年

愉自循行修復故堰溉田二百餘頃皆成良業

晉召伯埭 呂梁七埭

謝安傳上疏求北征出鎮廣陵之步丘

太元十年四月壬戌

築壘

曰新城築埭於城北後人追思之名為召伯埭

九域志揚州又

有龍舟堰十道志云魏文帝臨江試龍舟此堰因得名

謝玄傳玄既克苻堅乘

釁攻堅之兗州刺史張崇於鄆城走之

太元九年九月辛卯

兗州

既平玄患水道險澁糧運艱阻用督護聞人龔謀堰呂

梁水植柵立七埭為派擁二岸之流以利運漕公私利

便又進伐青州故謂之青州派

水經注太元九年左將軍謝玄云云

### 宋六門堰

宋書劉秀之為襄陽令襄陽有六門堰良田數千頃堰久決壞世祖遣秀之修復雍部大豐九域志鄧州六門堰召信臣所造以擁湍水累石為之旁開六石門以節水勢

### 宋玄武湖 北湖

宋書元嘉二十三年立玄武湖於樂游苑北 文選顏

延年應詔觀北湖田收詩

集曰元嘉十年

注丹陽郡圖經曰樂

遊苑晉時藥園元嘉中築隄壅水名為北湖

齊肥水堰

通監齊建元二年二月丁卯朔魏劉昶寇壽陽豫州刺史垣崇祖欲治外城堰肥水以自固皆曰自有肥水未嘗堰也恐勞而無益崇祖曰守郭築堰是吾不諫之策也乃於城西北堰肥水堰北築小城周為深塹使數千人守之魏人蟻附攻小城崇祖決堰下水魏攻城之衆



漂墜塹中魏師退走

齊有西陵牛埭并浦陽南北津柳浦四埭

齊丘仲孚

為曲阿令鑿長岡埭瀉瀆水以阻王敬則

### 梁肥水堰

韋叡傳天監四年侵魏拔小峴城進討合肥先是右軍司馬胡景畧至合肥久未能下叡案行山川曰汾水可以灌平陽即此是也乃堰淝水頃之堰成水通舟艦繼至陳書吳明徹攻壽陽堰肥水以灌城城中多腫泄死者什六七東晉欲作涂塘以遏胡寇唐秦王

雍洺水上流須賊度亟決之水暴至遂破黑闥山  
東平

後魏僕射陂

又見唐廣仁池

唐志鄭州管城縣有僕射陂後魏孝文賜僕射李冲因  
以為名

後魏督亢陂

見河渠類

東魏漳濱堰

通鑑興和三年十月乙巳發夫五萬築漳濱堰三十五日罷

齊督亢陂

北史齊乾明元年平州刺史嵇晔建議開督亢陂置屯田歲收稻粟數十萬石又於河內置懷義等屯以給河南之費

後周富平堰

後周書大統十六年

西魏文帝

涇州刺史賀蘭祥修富平堰開

渠引水東注于洛人獲其利

唐觀省陂

地理志汴州陳留有觀省陂貞觀十年令劉雅決水  
溉田百頃 玄宗紀開元十六年十一月甲辰弛陂  
澤禁

唐葛榮陂

地理志冀州信都有葛榮陂貞觀十一年刺史李興公  
開引趙照渠水以注之

唐十三陂

唐志海州有陂十三蓄水溉田皆貞觀以來築

唐通靈陂

姜師度傳為同州刺史又派洛灌朝邑河西二縣開河以灌通靈陂收弃地二千餘頃為上田置十餘屯帝幸長春宮嘉其功下詔褒美加金紫光祿大夫地理志

同州朝邑北四里有通靈陂開元七年刺史姜師度引

洛堰河溉田百餘頃

元和志在縣北四里二百三十步種稻田二千餘頃

京兆鄠

縣有漢陂華州下邽東南二十里有金氏二陂

隋志同

武

德二年引白渠灌之以置監屯潁州下蔡西北百二十

里有大滌陂八十里有雞陂六十里有黃陂東北八十  
里有渭陂皆隋末廢唐復之溉田數百頃

唐上陽積翠月陂

李適之傳開元中

六典開元二十四年

為河南尹其政不苛為下

所便玄宗患穀洛歲暴溢耗徭力詔適之以禁錢作三

大防

六典云修三陂

曰上陽積翠月陂

武德八年正月甲子幸月陂又七年正月庚子

幸月陂九年正月己未又幸  
九域志河南有月陂形如偃月自是水不能為患刻石

著功詔永王璘書皇太子瑛書額

唐雷陂 愛敬陂 句城塘湖 平津堰 富

人固本二塘

地理志揚州江都東十一里有雷塘一作貞觀十八年

會要十一年長史李襲譽引渠又築句城塘溉田八百頃通典

同有愛敬陂水門貞元四年節度使杜亞自江都西循

蜀岡之右引陂趨城隅以通漕溉夾陂田 食貨志初

揚州疏太子港陳登塘凡三十四陂以益漕河輒復堙塞淮南節度杜亞乃濬渠蜀岡疏句城湖愛敬陂起隄貫城以通大舟河益庠水下走淮夏則舟不得前節度使李吉甫築平津堰以洩有餘防不足漕運遂通

陳登為廣

陵守造愛敬塘灌田十頃

列傳李襲譽為江南循察大使揚州吳

大都會俗喜商賈不事農襲譽引雷陂水築勾城塘溉田八百頃以盡地利民多歸本杜佑貞元中節度淮南決雷陂以廣灌溉斥海濱棄地為田積米五十萬斛



列營三十區士馬整飭 杜亞治漕渠引湖陂築防庸

入之渠中以通大舟夾隄高印因得溉灌疏啟道衢徹

壅通堙 李吉甫元和三年九月節度淮南居三歲奏

蠲逋租數百萬築富一作利人固本二塘溉田且萬頃漕

渠庫下不能居水乃築堤閘以防不足洩有餘名曰平

津堰地理志揚州高郵有堤塘溉田數千頃元和中和節度使李吉甫築

唐雨施陂 廣潤陂 廣濟陂 德政陂 大

農陂 永豐陂 周氏陂 馬仁陂

地理志光州光山有雨施陂永徽四年刺史裴大覺積水以溉田百餘頃趙州平棘東二里有廣潤陂引大白渠以注之東南二十里有畢泓皆永徽五年令弓志元開以蓄泄水利綿州巴西有廣濟陂垂拱四年長史樊思孝令夏侯奭因故渠開引渠溉田百餘頃陳州西華有鄧門廢陂神龍中令張餘慶復開引潁水溉田宣州宣城東十六里有德政陂引渠溉田二百頃大厯二年觀察使陳少遊置南陵有大農陂溉田千頃元和四年

寧國令范某因廢陂置為石堰三百步水所及者六十

里

文粹韋瓘有大農陂記  
志會稽郡諸暨有大農湖

隋

有永豐陂在青弋江中

咸通五年置

荊州三河北十里有渠河塘西北  
六十里有孤山陂溉田三千頃

高紀

武德八年十月辛巳如周氏陂獵于北原九年三月丙

午如周氏陂 通典唐州比陽馬仁陂在縣北溉田萬

頃

### 唐延壽陂

地理志泉州莆田有延壽陂建中年置溉田四百萬頃

唐西湖 絳巖湖 上湖 下湖 北湖 陽

陂湖 任嶼湖 丹陽湖

地理志湖州長城有西湖溉田三千頃其後堙廢貞元

十三年刺史于頔復之人賴其利

會要同湖州刺史部有湖陂

異時溉田三千頃久廢頔行縣命修復隄閘歲獲秬稻蒲魚萬計

昇州句容西南三十

里有絳巖湖麟德中令楊延嘉因梁故堤置後廢大厯

十二年令王昕復置周百里為塘立二斗門以節旱暵

開田萬頃絳巖故赤山天寶中更名杭州餘杭南五里

有上湖西二里有下湖寶厯中令歸玠因漢令陳渾故  
迹置北二里有北湖亦玠所開溉田千餘頃玠又築甬  
道通西北大路富陽有陽陂湖貞觀十二年令郝某開  
南六十里有隄越州上虞西北二十七里有任嶼湖寶厯  
二年令金堯恭置溉田二百頃北二十里有黎湖亦堯  
恭置食貨志劉晏分官吏主丹陽湖禁引溉河漕不

涸

又見練塘

唐小江湖 廣德湖 東湖 甘棠湖

地理志明州鄖縣南二里有小江湖溉田八百頃開元

中令王元緯置民立祠祀之東二十五里有西湖溉田

五百頃天寶二年令陸南金開西十二里有廣德湖溉

田四百頃

政和八年廢為田

貞元九年

一云貞元九年

刺史任侗因故

迹增修

郡東錢湖受七十二溪累石為塘八十里天禧元年李夷庚重修中有四開七堰溉田五十四

萬畝

洪州南昌縣南有東湖元和三年刺史韋丹開南塘

斗門以節江水開陂塘以溉田江州潯陽南有甘棠湖

長慶二年刺史李渤築立斗門以蓄洩水勢 李翱作

江州南湖隄銘曰李渤長慶三年十二月截南陂築隄  
三千五百尺蓄水為湖天地作物功或不周賢人相之  
智與神侔潏潏南陂冬乾夏漉歷古迨茲孰為毗籌濬  
之斯來養民如身乃築長隄拒江之瀕千鍾響振不督  
而勤 曾鞏廣德湖記曰湖之大五十里其源出四明  
山北為漕渠東北入江大厯八年令儲仙舟更今名大  
中元年刺史李敬方刻石謂湖成三百年矣湖之興其  
在齊梁之際歟至道元年守丘崇元復之天禧二年李

夷庚正湖界起隄十八里限之熙寧元年十月張岫築隄九千一百三十四丈為埭二十

唐錢塘湖

見六井 劉道真錢塘記議曹華信家富議立防海塘始開幕有致土石一斛與錢一斗塘成一境蒙利縣本名泉亭於是改錢塘百姓懷德立碑塘所 隋志錢塘有臨平湖 水經注引錢塘記

唐萬壽湫



地理志邠州三水北二十里有萬壽湫大厯八年因風雷而成

唐路公溪 好溪

地理志歙州祈門有武陵嶺元和中令路旻鑿石為盤道西南十三里有閭門灘善覆舟於是開斗門以平其隘號路公溪歙縣東南有呂公灘本車輪灘湍悍善覆舟刺史呂季重鑿之處州麗水東十里有惡溪多水怪宣宗時刺史段成式有善政水怪潛去民謂之好溪

唐鑿沁水

韋武傳德宗時為絳州刺史鑿沁水灌田萬三千餘頃  
鹽書勞勉

唐新源水

地理志成都府溫江有新源水開元二十三年長史章  
仇兼瓊因蜀王秀故渠開通漕西山竹木

唐椒陂塘 謝塘 陵波塘 蒲帆塘 沙河

塘

地理志潁州汝陰南三十五里有椒陂塘引水溉田二  
百頃永徽中刺史柳寶積脩潤州金壇東南三十里有  
南北謝塘武德二年刺史謝元超因故塘復置以溉田  
吳興烏程東有官池元和中刺史范傳正開東南二十  
五里有陵波塘寶曆中刺史崔元亮開北二里有蒲帆塘  
刺史楊漢公開開而得蒲帆因名杭州錢塘南五里有  
沙河塘咸通二年刺史崔彥魯開

許州長社饒州鄆有  
陂塘百八十里節度

使高瑀立  
以溉田

唐捍海塘 防海塘 越王山堰 運道塘

地理志杭州鹽官有捍海塘隄長百二十四里開元元年重築越州會稽東北四十里有防海塘自上虞江抵山陰百餘里以蓄水溉田開元十年令李俊之增修大厯十年觀察使皇甫溫太和六年令李左次又增修之山陰北三十里有越王山堰貞元元年觀察使皇甫政鑿山以蓄洩水利又東北二十里作朱儲斗門北五里有新河西北十里有運道塘皆元和十年觀察使孟簡

開西北四十六里有新運斗門太和七年觀察使陸巨

置

諸暨東二里有湖塘天寶中令郭密之築溉田二十餘頃

春秋正義釋例曰海

自遼西北平漁陽章武渤海樂陵樂安北海東萊城陽

東海廣陵吳郡會稽十四郡之東界以東

東至于海當畫樂安北海

之東界

### 唐練塘

地理志潤州丹陽有練塘周八十里

納長山諸水漕運資之唐時禁盜決

者永泰中刺史韋損因廢塘復置以溉丹陽金壇延陵

之田民刻石頌之

劉晏奏聞詔書褒異練湖與晉陵新豐塘地相接八百餘頃溉四縣之

田以一寸益漕河一尺本朝紹興中向子諲奏開練塘乾道七年七月二十四日命漕臣沈度修築十月修

開及南北十門

李華復練塘頌練湖幅員四十里永泰元年

十一月二十三日拜韋損為潤州增理故塘繚而合之

廣湖為八十里象月之規儔金之固灝灝如吞吐日月

沈沈如韞蓄風雨所潤者遠原隰皆春疏為斗門河渠

通流

唐尚書塘 常稔塘 天水淮 永豐塘

地理志泉州晉江東一里有尚書塘溉田三百餘頃貞元五年刺史趙昌置名常稔塘後昌為尚書民思之因更名西南一里有天水淮灌田百八十頃太和三年刺史趙榮開莆田西一里有諸泉塘南五里有瀝潄塘西南二里有永豐塘南二十里有橫塘東北四十里有韻洋塘東南二十里有國清塘溉田總千二百頃並貞觀中置

唐白水塘 羨塘

屯田

神塘

地理志楚州寶應本安宜西南八十里有白水塘羨塘  
證聖中開置屯田西南四十里有徐州涇青州涇西南  
五十里有大府涇大府即揚州長慶中興白水塘屯田發青  
徐揚州之民鑿之北四里有竹子涇亦長慶中開衢州  
西安東五十五里有神塘開元五年因風雷摧山偃澗  
成塘溉田二百頃

唐千人塘 漢塘 陳令塘

地理志濠州鍾離南有故千人塘乾封中修以溉田蘇



州海鹽西北有漢塘太和七年開江州都昌南有陳令塘咸通元年令陳可夫築

唐高梁堰

地理志晉州臨汾東北十里有高梁堰武德中引高梁水溉田八百金泊

唐五節堰

地理志隴州汧源有五節堰引隴州水通漕武德八年水部郎中姜行本開後廢會要武德八年十二月行

本請於隴川開五節堰引水通運許之

唐六堰

百官志興成五門六門龍首涇堰滋隄凡六堰皆有丞  
貞觀六年皆廢 會要貞元十三年七月詔昆明池俯  
近都城蒲魚所產令京兆韓臯充使修堰

唐瓜谷山堰 枋口堰 萬金堰

地理志河中府龍門北三十里有瓜谷山堰貞觀十年  
築孟州濟源有枋音方口堰太和五年節度使溫造浚古

渠溉濟源河內溫武陟田五千頃趙州栢鄉西有萬金堰開元中令王佐所築以疏積潦 通典漢建安中曹公於淇水口下大枋木以成堰遏淇水東入白溝以通漕運時人號其處為枋頭

唐修復堰防

張守珪傳開元中為瓜州都督時渠堰為虜毀材木無所出守珪密請于神一昔大木數千章塞流下取之修復堰防州人刻紀其事

唐黃河堰 伊水石堰 石鼓堰 仲夏堰

地理志會州會寧有黃河堰開元七年刺史安敬忠築以捍河流河南府河南龍門山東抵天津有伊水石堰天寶十載尹裴迥置湖州安吉有郎閣池北有石鼓堰引天目山水溉田百頃皆聖厯初令鉗耳知命置明州鄞縣西南四十里有仲夏堰溉田數千頃太和六年刺史于季友築

唐遠濟堰 通濟堰 洛水堰 雲門堰 漢

陽堰

地理志蜀州新津西南二里有遠濟堰分四筒穿渠溉  
眉州通義彭山之田開元二十八年採訪使章仇兼瓊  
開眉州彭山有通濟大堰一小堰十自新津邛江口引  
渠南下百二十里至州西南入江溉田千六百頃開元  
中益州長史章仇兼瓊開綿州魏城北五里有洛水堰  
貞觀六年引安西水入縣民利之羅江北五里有茫江  
堰引射水溉田入城永徽五年令白大信置北十四里

有楊村堰引折脚堰水溉田貞元二十一年令韋德築  
神泉北二十里有折脚堰引水溉田貞觀元年開龍安  
東南二十里有雲門堰決茶山水溉田貞觀元年築  
陵州籍縣東五里有漢陽堰武德初引漢水溉田二百  
頃後廢文明元年令陳充復置後又廢

唐涇堰監 渠堰使

會要大厯四年三月十五日勅涇堰監先廢令復置貞  
元四年六月二十六日涇陽三白渠限口京兆尹鄭叔

則奏六縣分水之處實為利害請准諸堰例置監及丁夫守監十六年十一月以東渭橋納給使徐班兼白渠漕渠及昇原成國等渠堰使

唐常豐堰

李承傳為淮南西道黜陟使奏置常豐堰於楚州以禦海潮溉屯田瘠鹵收常十倍他歲地理志楚州山陽上有常豐堰大厯中黜陟使李承置以溉田

唐六門堰

舊紀大厯十二年十二月庚子京兆尹請修六門堰許之李頻傳為武功令有六門堰者廡廢百五十年方歲飢頻發官倉庸民浚渠按故道廡水溉田穀以大稔懿宗嘉之賜緋衣銀魚俄擢侍御史

唐考功堰

見河渠類

長樂堰

地理志鄂州永興北有長樂堰貞元十三年築

唐彭城堰 劉公渠

地理志京兆高陵寶曆元年令劉仁師更古白渠水道



渠成名曰劉公渠堰曰彭城 會要太和二年二月以

昭應令劉仁師充修渠堰副使

初為高陵令治  
涇陽三白渠

劉禹

錫高陵令遺愛碑曰涇水東行注白渠醜而為三以沃  
關中秦人常得善歲按水部式決洩有時居上游者不  
得以專利兵興以還涇陽人擁而專之邑為枯地征如  
初長慶三年劉君列上便宜寶曆元年鄭覃為京兆九  
月始具以聞冬十月築仲冬新渠成季冬新堰成

唐興成堰 渠 永豐倉

食貨志太和初歲旱河涸掇沙而進米多耗秦漢時故  
漕興成堰東達永豐倉咸陽縣令韓遼請疏之自咸陽  
抵潼關三百里可以罷車輓之勞宰相李固言以為非  
時文宗曰苟利於人陰陽拘忌非所顧也議遂決堰成  
罷輓車之牛以供農耕關中賴其利 李石傳石奏咸  
陽令韓遼治興成渠渠當咸陽右十八里左直永豐倉  
秦漢故漕渠成起咸陽抵潼關三百里無車輓勞則輟  
下牛盡可耕永利秦中矣李固言曰然恐役非其時帝

曰以陰陽拘畏乎苟利於人朕奚慮哉

石爲相

長安志

興成渠在咸陽縣西十八里

### 唐梁公堦

會要開元二年河南尹李傑奏汴州東有梁公堰年久  
堰破江淮漕梗傑奏發汴鄭丁夫濬之省功速就公私  
利之刻石水濱紀其績開元十五年正月十二日令將  
作大匠范安及檢行鄭州河口斗門先是洛陽人劉宗  
器言請塞汜水舊汴河於下流滎澤界開梁公堰置斗

門通淮汴至是新漕填塞行舟不通安及遂發河南懷  
鄭汴滑衛三萬人疏決舊河旬月畢 李傑傳河汴之

交舊有梁公埭廢不治南方漕弗通傑調汴鄭丁男復  
作之不費而利 地理志孟州河陰有梁公堰在河汴  
間開元二年河南尹李傑因故渠濬之以便漕運 劉

晏傳見宇文愷梁公堰廝河為通濟渠視李傑新隄盡  
得利病通典汴口堰在河陰縣西二十里又名梁公堰  
隋文帝開皇七年使梁睿增築漢古堰過河入汴

元和志同

金石錄開元十五年二月趙居正撰重開梁公堰碑  
天寶六載七月祁順之撰開梁公堰頌

唐京口埭 伊婁埭

見渠類

唐永濟隄 河隄 秋水隄 漢水隄

地理志滄州清池西北五十五里有永濟隄二永徽二  
年築西四十五里有明溝河隄二西五十里有李彪淀  
東隄及徒駭河西隄皆三年築西四十里有衡漳隄二

顯慶元年築西北六十里有衛漳東隄開元十年築南  
十五里有浮河隄陽通河隄又南三十里有永濟北隄  
開元十六年築江州潯陽東有秋水隄太和三年刺史  
韋珣築西有斷洪隄會昌二年刺史張又新築以窒水  
害洺州雞澤有漳洺南隄二沙河南隄一永徽五年築  
列傳盧鈞判戶部會昌中元年秋漢水害襄陽拜鈞山  
南東道節度築隄六千步以障漢暴明年春張東之  
為襄州刺史漢水齧城東之因壘為隄以遏湍怒 蕭

倣咸通中拜義成節度滑州瀕河累歲水壞西北防倣  
徙其流速去立隄自固人得以安 文粹盧肇作漢隄  
詩陰沴奸陽來暴于襄洎入大邪波端若鉞襄人怡怡  
聽命襄許分之卒伍令以麾鼓披峴斷楚飛石輓土聽  
築殷雷駭汗霏雨斯隄既成蜿蜿而平確爾山固屹如  
雲橫漢流雖狂堅不可蝕代年千億與天無極捍此巨  
災屹若磐石

唐江陵古隄二橋

地理志江陵貞元八年節度使嗣曹王臯塞古隄廣良田五千頃畝收一鍾又規江南廢洲為廬舍架為二橋荆俗飲陂澤乃教人鑿井人以為便 嗣曹王臯傳初江陵東北傍漢有古鄣不治歲輒溢臯修塞得其下良田五千頃規江南廢洲為廬舍架二橋跨江南流人自占者二千餘家繇荆抵樂鄉二百里其間墟聚凡數十不井飲臯始命鑿井以便人 會要貞元八年三月嗣曹王臯為荆南節度觀察使先是江陵東北七十里



廢田旁漢古隄壞決凡二處每夏則為浸溢臯始命塞之廣良田五千頃云云

唐侍郎堰

地理志彭州導江有侍郎堰其東百丈堰引江水以溉彭益田龍朔中築又有小堰長安初築漢州雒縣貞元末刺史盧士琨立隄堰溉田四百餘頃賈敦頤傳貞觀時為瀛州刺史州瀕滹沱滹二水歲溢溢寢如數百敦頤為立堰庸水不能暴百姓利之

唐扞江隄 扞水隄 邵父隄

韋丹傳元和時

二年二月

江西觀察使築隄扞江長十二里

實以疏漲凡為陂塘五百九十八所灌田萬二千頃

丹遺

愛碑云派湖入江節以斗門以走瀑漲鑿六百陂塘灌田一萬頃錮以長隄緣四千步明年水平人始歌舞

地理志洪州建昌南一里有捍水隄會昌六年攝令

何易于築饒州鄱陽縣東有邵父隄東北三里有李公

隄建中元年刺史李復築以捍江水成都江瀆祠北

十八里有萬歲池天寶中長史章仇兼瓊築隄積水溉

田南百步有官源渠隄百餘里天寶二載令獨孤戒盈築

唐海隄 漳隄

地理志福州閩縣東五里有海隄太和三年令李茸築先是每六月潮水鹹鹵禾苗多死隄成瀦溪水殖稻其地三百戶皆良田長樂東十里有海隄太和七年令李茸築立十斗門以禦潮旱則瀦水雨則洩水遂成良田海州朐山東二十里有永安隄北接山環城長七里以

捍海潮開元十四年刺史杜令昭築異州南宮西五十  
九里有濁漳隄顯慶元年築堂陽有漳水隄開元六年  
築武邑有衡漳石隄顯慶元年築宿州符離東北九十  
里有隋故牌湖隄灌田五百餘頃顯慶中復修 韋景

駿傳為肥鄉令

神龍中

縣北瀕漳舊防迫漕渠輒壞景駿

相地勢益南千步因高築障水至隄趾輒去

高瑀傳

為忠武節度使州比水旱無年瑀相地宜築隄庸百八  
十里時其鍾洩民賴不飢加檢校尚書右僕射 百官

志水部諸州堤堰刺史縣令以時檢行而涖其決築有  
埭則以下戶分牽禁爭利者

漢南北湖

地理志壽春合肥受南北湖皮革鮑木之輸亦一都會  
也

後周河隄

顯德六年二月丙子朔命王朴如河陰按行河隄立斗門  
於汴口甲申命韓令坤自大梁城東導汴水入于蔡水

以通陳頴之漕命袁彥浚五丈渠東過曹濟梁山泊以通青鄆之漕

建隆翟橋堰

翟橋堰在開封縣建隆元年置天聖四年十月辛卯淮南轉運言楚州北神堰真州江口堰修水閘成漕運便之歲省堰卒十餘萬

乾德河隄

周顯德元年十一月遣李穀按視河隄

三旬而畢

乾德元年

正月丁巳發近甸民數萬修畿內河隄

陳承昭護役

二年正

月治鄆州遙隄四年八月命韓重賁修滑州靈河隄十

月壬午成河復故道五年正月命開封大名及鄆瀘等

十五州長吏兼河隄使事戊戌調民數萬治河隄

六年築開

封府陽武縣之越隄

開寶三年正月癸丑十二月癸巳治河隄五

年正月丙子命開封天雄等十一處各置河隄判官六

月戊申命曹翰發徒一萬五千人修陽武河隄塞陽武

濮陽決河十二月成六年正月癸酉調民夫修魏縣河

隄興國二年七月塞滎澤決河命李崇矩自陝至滄按  
行河隄繕治之三年正月遣使十七人分治河隄五年  
正月命六人發民夫治衛澶濮濟鄭貝河隄八年九月  
遣使行視滑州河兩岸古遙隄雍熙二年正月命十三  
人治河隄淳化二年三月以霖雨詔諸州河隄使豫圖  
繕治祥符五年八月命使者秦義等乘傳至鄆視河隄  
城池圖上利害

先是五月  
決河棣州

七年河決澶州發徒數千築

新隄二百四十步水乃順復慶厯元年命王克恭

內議



塞滑州橫隴決河克恭請先治金隄天雄守李迪亦請

修金隄禦下流三月詔止勿塞皇祐元年九月修黃汴

御河隄元豐三年四月鄆州築遙隄成長二十里廣六

十尺高一丈

役夫六千一月而成詔獎守臣李肅之  
真宗時河決滑州陳堯佐鑿木如編齒置

於湍流隨水下謂之木龍隄乃  
咸又護以長隄郡人謂之陳公隄

景祐三年五月丙

午詔護大名府金隄慶厯元年三月庚戌修金隄慶

厯七年五月乙酉知保州王中庸增秩以提舉築河北

五州軍隄道成特遷之程子曰河北只見鯨隄無禹

隄鯨埋洪水故無功禹則導之而已

祥符利民隄

鳳州梁泉之利民隄磴子堰祥符二年置

祥符錢塘江隄

杭州江隄舊以竹籠石而潮齧之率數歲輒復壞祥符

七年潮直抵郡城守臣戚綸漕臣陳堯佐議實薪土以

捍之

實錄云累木為岸

或言非便命發運使李溥按視十月壬

戌溥請如錢氏舊制立本積石以捍潮波從之

其後踰年隄不

成卒用薪土天聖四年二月辛酉侍御史方謹言請修江岸

二斗門

實錄云北開

慶厯六年

志云二年

漕臣杜杞築錢塘隄

起官

浦至沙陞以捍風濤

仁宗時俞獻卿知杭州鑿西山石作堤長十里慶厯中漕臣田瑜壘石數萬為龍

隄浙江石塘翔於錢氏景祐中工部郎中張夏為轉

運使置捍江兵採石修塘

志云為石隄

人為立祠

嘉祐六年十月辛巳

贈夏太常少卿古本用木岸張夏始易以石

蘇軾曰自

紹興二十年修石隄二

十二年十一月二十五日吏部尚書林大鼐言潮為吳患其來已久捍禦之策見於浙江亭碑自江流失道潮

與洲鬪怒號激烈千霆萬鼓民以不寧宜顯置一司究  
利病而後興工乾道七年十一月十八日帥臣沈復修  
石隄成增石塘九十四丈 吳越春秋吳王取子胥屍

投之江中因隨流揚波依潮往來蕩激崩岸

又曰前潮

伍子胥也重水大舂種也

史記秦始皇三十六年東游至錢

塘臨浙江水波惡乃西百二十里從狹中渡以此

知錢塘江之險 唐白居易傳為杭州刺史築隄

捍錢塘湖 文選注山謙之南徐州記曰京江禹

貢北江有大濤至江乘北激赤岸尤迅猛 水無涯而

合岸山孤映而若浮金祇理轡素月告望宏濤鬱起重

流電驤

賦清

呼吸萬里吐納靈潮

漂飛雲運餘艍

賦江

浮天無岸

吐星出日天與水際

浮天沃日

包乾

之奧括坤之區

賦海

錢塘洶然以獨起殊百川之進退

仲秋忽爾而自興異三時之滂霈 浙者折也潮出海

屈折而倒流也其地形右蟠吳而大江覃其腹左挾越

而巨澤灌其喉獨茲水夾羣山而遠入射一帶而中投

潮以平來百川皆就浙入既深激而為鬪羣陰既

歸水與天違當宵分八月之際避至烈之輝因圓光之既

對引大海以羣飛盧肇海潮賦淋淋若白鷺下翔飄飄如

輕車勒兵枚乘注天波於析水歛東極乎扶桑庾闡江賦

萬古波濤中分二瀾一時形勝密拱九重濤聲動地

浪勢粘天川后回瀾波臣受職修鯤吐浪驚浪

雷奔

天聖泰州捍海堰

海陵郡有古堰亘百有五十里久廢不治秋濤冒民田  
監西溪鹽稅范仲淹言於發運副使張綸請修復之議  
者謂將有蓄潦之憂綸曰濤之患歲十而九潦之災歲  
十而一護九而亡一不亦可乎天聖四年八月丁亥詔

修捍海堰

綸奏仲淹知興化縣總其役詔遣中使按視  
命轉運使胡令儀度其可否令儀請必行前

議綸請身自董役兼領海陵郡五年六月辛卯從之  
築堰自小海寨東南至景莊一百八十里於運河置閘  
納湖水以通漕起於天聖三載之秋成於六載之春復逋戶二

千六百民為綸立祠仲淹作頌七月甲午令儀綸遷秩

仲淹去職二人實成之實錄云築堰凡一百八十一里五年十二月乙卯諭請以間因二十頃墾耕收租增築隄防

辛卯賜後卒緡錢

淳熙四年十月泰州修桑子

河堰

乾道捍海堰

乾道七年九月十一日知秀州丘密言華亭東南大海古有堰十八所欲興修從之八年正月二十二日築捍海塘堰成二月十五日御史蕭之敏按視言捍海堰并東西兩岸塘通計八十四里可以永久詔增密秩



乾道六堰

興元府山河堰溉民田四萬餘頃世傳蕭何所為嘉祐  
中史炤奏上堰法獲降敕書刻石堰上乾道七年吳拱  
修六堰浚大小渠六十五復見古迹溉南鄭褒城田二  
十三萬餘頃五月詔褒之 紹興七年五月吳玠等修  
興元府洋州渠堰詔獎之

乾道江陵二隄

七年十月十七日湖北漕臣李燾請修江陵潛江縣里

社虎渡二隄詔明年修築八年六月十六日荆南守臣葉衡請築襄陽沿江大隄

運路二十一堰

國史職官志堰楚州之黃蒲寶應北神西河高郵之新河樊良揚州之邵伯瓜洲潤州之京口呂城常州之望亭奔牛秀州之杉青杭州之長安越州之曹娥梁湖錢青孟州之濟源汝州之梁縣泰州之白蒲捍海總二十一監官各一人餘堰不居運路者皆領於州縣渡六十

五

天文羅堰三星在牽牛東主隄塘灌溉

孫叔敖起芍陂楚受其惠文翁穿決水蜀以富饒白公  
引涇水谷口歌禾黍史起鑿漳河鄴旁詠稻梁張閭築  
新豐李襲引雷陂灌晉陵惟揚之田各八百餘頃召父  
杜母之惠靡不由之 灑沉災導流惡數旬而馬牛辨  
經時而桑田復 因地則氣不壅達變則民不倦 復  
地力阜財求民餒不愆神猾可懷禦菑鍵患莫匪嘉績  
昔鄴中渠成邑思西門鴻隙陂壞郡怨方進 斯民

之生理無極而陵陸川浸之執屢遷 決漳灌鄴旁之  
田鑿涇沃關內之土 隄繇 平繇行水 唐樊珣絳  
巖湖記云昔叔敖芍陂能張楚國史起漳水竟富魏邦  
秦稱鄭白漢歌召杜



欽定四庫全書

子部

玉海卷二十四

詳校官給事中<sub>臣</sub>查善長

主事<sub>臣</sub>祁韻士覆勘

總校官進士<sub>臣</sub>朱 鈐

校對官編修<sub>臣</sub>朱 攸

謄錄監生<sub>臣</sub>夏清和

欽定四庫全書

玉海卷二十四

宋 王應麟 撰

地理

泉井

玉井四星在參左東南四星曰軍井易以巽木入乎坎水之下而上出其水故為井曰木上有水井君子以勞民勸相以君養民使民相養皆取井養之義

神農九井 社

漢郡國志南陽郡隨縣注盛弘之荊州記曰隨縣北有厲鄉村重山有一穴相傳云神農所生又有周回一頃二十畝地外有兩重塹中有九井神農既育九井自穿每汲一井則衆井水動即以此地為神農社歲祀之

水經

注同

史記索隱淮陽有神農井 帝王世紀神農起列

山為列山氏今隨厲山是也 國史志潞州長子縣有

神農井

黃帝井 益井

易井卦釋文周書云黃帝穿井世本云化益作井宋衷  
云伯益也堯臣淮南子本經訓伯益作井而龍登元  
雲神棲崑崙能愈多德愈薄矣注伯益佐舜初作井

郭璞

井賦曰益作  
井龍登天

黃帝泉

史記正義阪泉今名黃帝泉在媯州懷戎縣東五十六  
里出五里至涿鹿東北與涿水合晉太康地理志云涿



鹿城東一里有阪泉上有黃帝祠

堯井

論衡傳言伯益作井龍登元雲神棲崑崙神農教民耕  
耨耕土以爲田鑿地以爲井堯時五十之民擊壤於塗  
觀者曰大哉堯之德也擊壤者曰吾日出而作日入而  
息鑿井而飲耕田而食堯何等力堯時已有井矣 郡  
國志注堯井在汜水東十五里

舜井

郡國志濮州姚墟有二井是舜井也 水經滌水注山  
上有舜祠山下有大穴謂之舜井抑亦茅山禹井之比  
矣

舜甘泉

水經注中山記曰郭東有舜氏之甘泉有舜及二妃祠

禹井

漢地理志山陰縣會稽山在南上有禹井

後志注郭璞云有禹井

周軍井

周禮挈壺氏以令軍井注鄭司農云為軍穿井井成挈壺懸其上以表井

管仲井

左傳莊三十二年春城小穀為管仲也注小穀齊邑濟北穀城縣城中有管仲井

漢浮沮井

武紀元鼎六年秋遣浮沮將軍公孫賀出九原注臣瓚曰浮沮井名在匈奴中去九原二千里見漢輿地圖

匈奴傳漢已滅兩越遣故太僕公孫賀將萬五千騎出  
九原二千餘里至浮苴井不見匈奴一人而還

漢溫泉 唐溫泉 溫泉銘 浪井

漢武故事驪山湯初始皇砌石起宇武帝加修飾焉

張衡溫泉賦余適驪山觀溫泉浴神井溫泉汨焉以流

穢兮蠲除苛慝服中正兮 張衡東京賦溫液湯泉薛

綜注在河南梁縣界 左思魏都賦溫泉溢涌而自浪

華清蕩邪而難老注溫水在廣平都易縣 潘岳西征

賦南有湯井溫谷注雍州圖曰溫湯在新豐溫泉在藍田縣界 王廙洛都賦雞頭溫水魯陽神泉 周庾信溫湯碑序其色變者流為五雲之漿其味美者結為三危之露豈獨醴泉清疾聞於漢武之朝神水蠲疴在并咸康之世 周王褒溫湯銘挺此溫谷驪丘之陰白磬上徹丹沙下沉華清駐老飛流瑩心

唐貞觀四年二月己亥幸溫湯二十二年正月戊戌幸癸卯御製溫湯碑示羣臣 開元十六年三月京兆三

原浪井出十九年六月辛未有浪井出於邛州龍興觀  
之平地五色彪炳二十一年五月丁卯蘭州有浪井出  
及醴泉湧 金石錄溫泉銘唐太宗御製并行書 張  
說有溫泉箴 文選雪賦注盛弘之荊州記曰南陽郡  
城北有紫山東有一水冬夏常溫因名湯谷水經注曰  
曲阿季子廟前井及潭常沸名曰沸井沸潭 宋志浪  
井不鑿自成王者清靜則應

漢鹽井 火井

貨殖傳蜀多鹽井羅裒以鹽井富 左思蜀都賦火井

沈熒於幽泉高燭飛煽於天垂

蜀郡有火井在臨邛縣西南鹽井也

家有

鹽泉之井

臨邛漢安皆有鹽井充國縣有鹽井數十揚雄蜀都賦西有鹽泉鐵冶

郊祀

志宣帝祠火井於鴻門注地理志西河鴻門縣有火井

祠

火從地出

初學記載異說臨邛有火井漢室之盛則赫

熾桓靈際浸微諸葛孔明一窺而更盛

### 漢金泉

地理志酒泉郡注師古曰舊俗傳云城下有金泉味如

酒

應劭漢官儀曰酒泉城下有金泉水如酒

漢鞠水 龍泉

地理志弘農郡析縣黃水出黃谷鞠水出析谷俱東至  
酈入湍水師古曰即今所謂菊潭也 南海郡龍川縣  
注師古曰裴氏廣州記云有龍穿地而出即穴流泉因  
以為號 國史鄧州南陽有菊水

賈誼井

水經注湘州賈誼宅地中有一井是誼所鑿極小而深



漢疏勒城井 貳師泉

耿恭傳永平十七年冬騎都尉劉張出擊車師請恭為司馬與奉車都尉竇固及從弟駙馬都尉東破降之始置西域都護戊巳校尉乃以恭為戊校尉屯後王部金蒲城謁者關寵為巳校尉屯前王柳中城屯各置數百人明年三月單于遣左鹿蠡王二萬騎擊車師遂破殺後王安得而攻金蒲城後解去恭以疏勒旁有澗水五月乃引兵據之七月匈奴復來攻恭恭募先登數千人

直馳胡騎散走匈奴遂於城下擁絕澗水恭於城中穿井十五丈不得水吏士渴乏至笮馬糞汁而飲之恭仰嘆曰昔貳師將軍拔佩刀刺山飛泉湧出今漢德神明豈有窮哉乃整衣服向井再拜為吏士禱有頃水泉湧出衆皆稱萬歲乃令吏士揚水以示虜虜出不意以為神明遂引去唐李嗣業傳為疏勒鎮使漢耿恭故井久涸禱已泉復出識者以為至誠所感

魏墨井

左思魏都賦墨井鹽池玄滋素液注鄴西高陵西伯陽城西有石墨井井深八丈

唐冰井

百官志司農屬官上林令掌苑園池季冬藏冰千段先立春三日納之冰井以黑牡秬黍祭司寒啟冰亦如之會要貞元元年十二月九日敕立春日內外兩井納冰二千五百段每段長三尺厚一尺五寸令府縣澄潔供進西晉庾儵有冰井賦

唐亳州九井

五行志開元二十九年亳州老子祠九井涸復湧

劉義慶幽

明錄曰襄邑縣南瀨鄉老子廟中有九井

開元二十九年正月亳州刺史

鄭愿奏混元廟中之井涌氣成雲五色相映三月己丑

亳州奏老君廟九井先涸自奉詔增修觀宇九泉皆涌

枯木復榮 括地志苦縣在亳州谷陽縣界有老子宅

及廟廟中有九井尚存

在今真源縣

漢郡國志陳國苦有

賴鄉注伏滔北征記曰有老子廟廟中有九井水相通

古史考曰有曲仁里老子里也

唐安寧鹽井

南詔傳安寧城有五鹽井玄宗詔特進何履光以兵定南詔取安寧城及井復立馬援銅柱乃還

唐醴泉

地理志涼州天寶縣本番禾天寶三載以山出醴

泉更名

三月丙子武威郡上言見祥瑞類

貞觀六年醴泉出丹

霄殿西七年二月出縣州香溪十一年九月醴泉

出

唐甘井 毛公井 韓公井

地理志滄州清池有甘井開元二十年令毛某母老苦水鹹無以養縣舍穿地泉湧而甘民謂之毛公井

韓朝宗傳開元二十二年初置十道採訪使朝宗以襄州刺史兼山南東道襄州南楚故城有昭王井傳言汲者死人雖喝困不敢視朝宗移書諭神自是飲者亡恙人號韓公井 宋祁作韓公井賦 裴識傳帥靈武地

斥鹵無井識誓神而鑿之果得泉

唐甘泉 鵬鵠泉

地理志澤州高平有泫水一曰丹水貞元元年令明濟引入城號甘泉有省冤谷本殺谷玄宗幸潞州過之更名豐州西受降城北三百里有鵬鵠泉

唐應聖泉

楊朝晟傳貞元九年為邠寧節度十三年春請城方渠合道水波以遏吐蕃路詔問須兵幾何報部兵可辦帝

問前日城五原興師七萬今何易耶對曰鹽州之役虜  
先知之今薄戎而城虜料王師不十萬勢難輕入若發  
部兵三日至塞下未三旬畢城積芻聚糧留卒守之寇  
至不能拔萊野剪夷虜旦夕走屯方萬全策也帝納其  
策師次方渠水乏有青蛇降險下走視其跡水從而流  
朝晟築防環之遂為停淵士飲仰足圖其事以聞詔置  
祠命泉曰應聖已城三月成吐蕃悉衆至度不能害乃引去  
開地三百里



唐六井

白居易傳長慶二年為杭州刺史始築隄捍錢塘湖鍾洩井水溉田千頃復浚李泌六井民賴其汲

六井李泌

作相國井西井金牛池方井白龜池小方井白樂天治湖浚井刻石湖上本朝嘉祐中沈文通於六井之南為南井熙寧六年春陳襄修六井元祐五年四月蘇軾復治六井與沈公井改作尾筒又創為二井

唐上善泉

地理志坊州中部州郭無水東北七里有上善泉開成二年刺史張怡架水入城以紓遠汲四年刺史崔駢復增修之民獲其利後思之為立祠

唐宜春泉

地理志袁州宜春有宜春泉醞酒入貢

祥符廣孝泉 舜井

贊記

祥符四年二月祠后土甲子車駕次河中府幸舜廟

通典

媽汭水今有舜廟在焉

觀舜井其二井南北相連可秉炬入蓋史

所謂匿空旁出者公府中泉脉皆鹹此水獨甘釀酒尤佳俗傳有疾者飲之或愈詔賜名廣孝泉令本府修飾墻垣帝作贊紀之又令王欽若撰記於側改舜泉坊為廣孝坊五月庚子詔於舜井側建廟又唐廣明中王重榮敗趙璋李誓衆於市樓以克復為名上曰此一時之事不若因舜都舊名為號丁卯遂改榜曰薰風樓命陳堯叟為記

雍熙潤德泉圖

雍熙二年五月癸酉鳳翔府言岐山縣周公廟有泉忽涌出耆舊相傳時平則流世亂則竭唐安史之亂泉竭至大中年復流號潤德泉自後又涸今忽湧清澄甘潔甚異於常因圖之以進廟在岐山西北七八里後百步晏殊為贊曰隱顯以時靈符孔彰東坡集云廟在岐山西北七八里廟後百許步有泉依山湧洌異常國史所謂潤德泉詩云翠鳳舊依山碑兀清泉長與世窮通周書大聚云闢關修道五里有郊十里有井二十里有

舍 詩正義應劭風俗通云古者二十畝為一井因為市

交易故稱市井 易注井以清潔不變更為義鄭

云井法也

井居其所而遽

穿重象之十仞瓶玉甃之百

節營之不日既汲既滯潛流炤炤寒泉冽冽

江道井賦

鑿井之義濟人為德名著乎東宿之躔象見乎

河圖之畫

道涂

匠人營國經涂九軌環涂七軌野涂五軌環涂以為

諸侯經涂野涂以為都經涂

堯康衢

列子堯微服遊於康衢

康莊之衢

聞兒童謠曰立我蒸民莫

匪爾極不識不知順帝之則

禹九道

史記紀禹開九州通九道陂九澤度九山正義通達九州之道路 左傳禹經啟九道

周五涂

夏官司險設國之五溝五涂而植之林以為阻固皆有  
守禁以達其道路注五涂徑畛涂道路也又見遂人量人

書天下之涂數而藏之注謂支湊之遠近候人掌其

方之道治合方氏掌達天下之道路秋官野廬氏

掌達國道路至於四畿左傳曰晉為盟主司空以時

平易道路

漢棧道

高紀元年夏四月張良至襄中因說漢王燒絕棧道以

備諸侯盜兵亦視項羽無東意注棧即閣也今謂之閣

道

張良傳云漢王之國良送至褒中遣良歸韓良因說漢王燒絕棧道示天下無還心以固項王意通使良

還行燒絕棧道

淮南王曰人言絕成臯之道天下不通趙

充國奏繕鄉亭浚溝渠治湟陜以西道橋七十所令可

至鮮水左右唐歐陽詹有棧道銘

### 漢甬道

高紀二年五月漢王屯滎陽築甬道屬河以取敖倉粟

應劭曰恐敵鈔輜重故築垣牆如街巷也三年十二月項羽數侵奪漢甬道



漢軍乏食五年五月上曰給餉餽不絕糧道吾不如蕭何

漢回中道

武紀元封四年冬十月行幸雍祠五時通回中道遂北出蕭關注應劭曰回中在安定高平有險阻三輔黃圖回中宮在汧元封六年冬太初四年冬天漢二年春幸回中後郡國志右扶風汧有回城名回中來歙開道處

漢靈山道

司馬相如傳畧定西南夷通靈山道橋孫水注張揖曰  
鑿開靈山道置靈道縣

漢馳道

成紀上嘗急召太子出龍樓門不敢絕馳道

應劭曰馳道天子所

行道也若今之中道

乃著令令太子得絕馳道 平紀元始元年

六月罷三輔馳道 列傳周勃從高祖擊燕所將卒當

馳道為多注師古曰當高祖所行之前 江充逢館陶

長公主行馳道中呵問之後從上甘泉逢太子家使乘車馬行馳道中充以屬吏注如淳曰令乙騎乘車馬行馳道中已論者沒入車馬被具 賈山曰秦馳道之麗道廣五十步三丈而樹厚築其外隱以金椎樹以青松

秦皇二十八年治馳道

王訢守右扶風武帝過扶風宮館馳道修治供張辦 鮑宣為司隸丞相孔光四時行園陵官屬以令行馳道中宣沒入其車馬注如淳曰令諸使有制得行馳道中者行旁道無得行中央三丈 翟方進

從上甘泉行馳道中司隸校尉陳慶効奏沒入車馬

黃霸守京兆尹坐發民治馳道不先以聞

吏循

史平準

書既得寶鼎立后土太一祠公卿議封禪事而天下郡國皆豫治道橋繕故宮及當馳道縣縣治官儲設供具而望以待幸毛詩傳年不順成馳道不修

文選注君必乘車馬故以馳名陸機洛陽

記宮門及城中大道皆分作三中央御道兩邊築土牆高四尺餘外分之唯公卿尚書章服道從中

道凡人皆行左右左入右出夾道種榆槐 劉盆  
子傳鄧禹夜戰橐街中注三輔舊事曰長安城中  
有橐街

漢飛狐道

王霸傳建武十三年盧芳與匈奴烏桓連兵寇盜詔霸  
將弛刑徒六千餘人與杜茂治飛狐道堆布土石築起  
亭障自代至平城三百餘里又陳委輸可從溫水漕以  
省陸轉輸之勞事皆施行注飛狐道在今蔚州飛狐縣

北通媯州懷戎縣即古飛狐口也 前酈食其傳距飛  
狐之口注臣瓚曰在代郡西南 唐地理志雲州雲中  
有陰山道青陂道皆出兵路

漢橋道

鄭弘傳建初八年為大司農舊交趾七郡貢獻轉運皆  
從東冶汎海而至風波艱阻沉溺相系弘奏開零陵桂  
陽嶠道至今為常路

建武十七年馬援南擊交趾緣海而進隨山刊道千餘

里十八年春軍至浪泊上

漢子午道

又見下

王莽傳元始五年秋通子午道從杜陵直絕南山徑漢中注師古曰子北方午南方言通南北道相當今京城直南山有谷通梁漢道者名子午谷又宜州西界慶州東界有山名子午嶺此則北山者是子南山者是午共為子午道元和志子午關在長安縣南百里

漢褒斜道

詳見漕運

順紀延光四年即位十一月乙亥詔益州刺史罷子午

道通褒斜路注子午道平帝時通三秦記子午長安正

南山名褒斜漢中谷名南曰褒北曰斜 三國志魏延

曰直從褒中出循秦嶺而東當子午而北不過十日可

到長安

諸葛孔明揚聲  
由斜谷道取郿

括地志褒谷在梁州褒城北五

十里斜水源出褒城西北九十八里 水經注褒水東

南歷小石門穿山道道六丈有餘刻石言漢永平中司

隸校尉楊厥所開建和二年王升琢石頌德蓋因石牛



道而廣之

唐斜谷道

封敕傳歷平盧興元節度使初鄭涯開新路水壞其棧  
敕更治斜谷道行者告便

唐參天至尊道

通鑑貞觀二十一年春正月丙申會要九日以鐵勒回紇等

十三部內附置六部督府瀚海金微燕然幽陵龜林盧山七州阜蘭高

鵝田榆溪各以酋長為都督刺史各賜金帛錦袍會要

鄴林賓顏

云給

元金魚黃金為字以為符信及還上御天成殿宴設十部樂遣之諸

酋長奏稱臣等既為唐民往來天至尊所如詣父母請

於回紇以南突厥以北開一道謂之參天可汗道置六

十八驛各有馬及酒肉以供過使歲貢貂皮充租賦會要

北置郵驛總六十八所以通四月丙寅置燕然都護府統

六都督七州以李素立為之回紇傳吐迷度入朝云

云渠領共言請於回紇突厥部治大涂號參天至尊道

世為唐臣乃詔磧南鵠鵠泉之陽置過郵六十八所具

羣馬湏肉待使客歲納貂皮為賦拜吐迷度瀚海都督

問對及舊紀並云  
置驛六十六所

唐山西運道 開砥柱漕路

見漕運類 通鑑陝州水陸運使李泌奏自集津至三  
門鑿山開車道十八里以避砥柱之險貞元二年二月  
道成

唐西極道

見門闕類

唐大庾嶺新路

地理志韶州始興有大庾嶺新路開元十七年詔張九齡開

唐駱谷路

地理志洋州興道有駱谷路南口曰儻谷北口曰駱谷真符本華陽天寶八載開清水谷路復置因鑿山得玉冊更名

開塞

兩河天關其星為天關周禮司關掌國貨之節以聯  
門市五伯時諸大侯國皆有之楚有昭關魯有六關  
趙有井陘高陽關魏有漳關秦有榆中臨晉峽武二  
關關之大小不同其藩塞沮隘捍禦邦域則一也然  
長世字毗者以道德為藩不以襲險為屏

周司關 關尹 節傳

周禮司關上士二人中士四人每關下士二人

關界上之門

掌國貨之節以聯門市司貨賄之出入者掌其治禁與

其征厘

關下亦有邸客舍

凡所達貨賄者則以節傳出之

傳如

所過凡

四方之賓客啟關則為之告有外內之送令則

以節傳出內之

鄭司農說周之秩官有之曰敵國賓至關尹以告行理以節逆之

掌節

門關用符節

門關司門司關也

史記尹喜為關令 孟子古

之為關將以禦暴

### 周十二關

司關疏司關總檢校十二關所司在國內下云每關下士二人者自在關門開閉王畿千里王城在中面有五

百里界首面置三關則亦十二關故云關界上門也

遺人䟽門關之委積門謂十二國門關謂十二關門出入皆有稅 野廬氏注輦互者車有輶輶抵閣舟有砥柱之屬 記玉藻注殷則關譏而不征䟽王制是殷禮

魯六關

左傳臧文仲廢六關

仁三不

注塞關陽關之屬凡六 鹿

門之關 齊僂介之關暴征其私 使有司毀關去禁

郭開 鹽鐵論諸侯之有開梁自戰國始

楚扞關

武關  
昭關

楚世家肅王四年

周安王二十五年

蜀伐楚取茲方楚為扞關

以距之

李熊說公孫述曰東守巴郡距扞關之口郡國志巴郡魚復縣有扞關華陽國志曰巴楚相攻

伐故置江關陽關括地志陽關今涪州扞關今峽州巴山縣界江關今夔州魚復縣南二十里江南岸白帝城

懷王二十年齊遺楚王書曰王取武關蜀漢之地則楚

之強百萬也

武關在商州東一百八十里商洛縣界

頃襄王元年秦發兵

出武關攻楚

張儀傳說楚曰云云舫船載卒下水而

浮一日行三百餘里不至十日而距扞關 伍子胥傳



奔吳到昭關

關在西江乃吳楚之竟

戰國策蘇秦說趙曰

史記作蘇

厲沙丘至距鹿三百里距於扞關

趙陸道之關楚水道之關

鹽鐵

論楚自巫山起方城屬巫黔中設扞關以距秦 水經

江水自關東逕弱關捍關注捍關廩君浮夷水所置也

弱關在建平秭歸界昔巴楚數相攻伐藉險置關以相

防捍 輿地廣記古捍關楚肅王所作以拒巴蜀 公

孫述傳使將軍侯丹開白水關

在漢陽西縣

北守南鄭任滿下

江州東據扞關遣田戎任滿出江關下臨沮夷陵間

岑彭傳彭自率臧官劉歆長驅入江關

魏蒲坂關

水經注竹書紀年魏襄王七年秦王來見于蒲坂關

秦函谷關

武關

詳見下

史記蘇秦約從山東六國共攻秦楚懷王為從長至函  
谷關秦出兵擊六國六國兵皆引而歸 張儀曰秦兵  
不敢出函谷關十五年 蘇秦曰東有殽函之固 范  
雎曰北有甘泉谷口南帶涇渭右隴蜀左關坂 楚懷

王入武關秦伏兵絕其後秦韓之地形相錯如繡  
周文收兵至關水經注丹水自商縣東南流注歷少  
習出武關秦之南關也通南陽郡左傳少習京相璠曰  
楚通上洛阨道也荀子秦有松栢之塞

秦四塞

蘇秦傳秦四塞之國也正義東有黃河有函谷蒲津龍  
門合河等關南山及武關峽關西有大隴山及隴山關  
大震烏蘭等關北有黃河南塞是四塞之國被山帶渭

婁敬傳秦地被山帶河四塞以為固

漢武關 峽關 臨晉關 邊關 靈關 天

井關 美陽關 常山關 江關 居庸關

五原關

高紀秦三年八月沛公攻武關

注應劭曰武關秦南關通南陽大潁曰在析西

百七十里 史記正義括地志曰故武關在商州商洛縣東九十里春秋時少習 九月子嬰遣

將將兵拒峽關

注應劭曰峽山之關李奇曰在上洛北藍田南武關之西括地志藍田關在

雍州藍田縣東南九十里即秦峽關也杜篤論都賦關孟守峽山東道窮 沛公引兵繞峽關

擊秦軍元年九月漢王遣將軍薛歐王吸出武關三年

五月轅生說漢王曰願君王出武關 武紀大初四年

冬徙弘農都尉治武關稅出入者以給關吏卒食 成

紀陽朔二年秋關東大水流民欲入函谷天井壺口五

原關者勿苛留

注應劭曰天井在上黨高都壺口在壺關五原在代郡

功臣表周

勃守峽關 列傳張良南攻下宛西入武關沛公欲以

二萬人擊秦峽關下軍良曰不如因其解擊之 周勃

從沛公破武關峽關

太康地理志武關當冠軍關西峽關在武關之西

東守峽

開擊項籍 樊噲攻武關至霸上 灌嬰定南陽郡西

入武關從東出臨晉關擊降殷王

史記正義臨晉關即清津關也在臨晉縣

今在同州

曹參從西攻武關峽關取之以中尉從出臨晉

關至河內 韓信為大將謂漢王曰大王之入武關秋

毫亡所害進兵擊魏魏盛兵蒲坂塞臨晉信益為疑兵

陳船欲度臨晉 酈商別將攻旬關

注師古曰漢中旬水上之關也今在

汾陽西定漢中 酈食其曰願急復進兵收取滎陽據

敖庾之粟塞成臯之險杜太行之道距飛狐之口

注代郡西

南守白馬之津以示諸侯形制之勢 晁錯對策通關

去塞不尊諸侯

通關梁一遠近

吳王濞臣田祿伯曰願得五

萬人入武關

周亞夫為太尉東擊吳楚至霸上趙涉

說亞夫曰將軍何不從此右去走藍田出武關抵雒陽

伍被為淮南中郎云云王曰今我先要成臯之口下

潁川兵塞轅轅伊闕之道

史記正義轅轅故關在河南雒氏南四十里伊闕故關在

河南縣南十九里

發南陽兵守武關河南太守獨有雒陽耳然

此北尚有臨晉關河東上黨與河內趙國界者通谷數

行汲黯曰愚民市買長安中而文吏繩以為闌出財

物如邊關

注應劭曰律胡市吏民不得持兵器及錢出關臣瓚曰無符傳出入為闌

司馬

相如使畧定西南夷邛笮冉駹斯榆之君皆請為臣妾

除邊關邊關益斥西至沫若水

二水名

南至牂柯為徼

徼謂

以木石水為界

通靈山道橋孫水

出臺坐縣

以通邛笮還報天子大

說難蜀父老曰乃闢沫若徼牂柯鑿靈山

史記正義鑿靈山通以關

也鎮兵

唐志雅州靈山有靈關又有靈關蜀都賦靈關為門玉壘為宇

賈捐之曰武

帝北卻匈奴萬里更起營塞

匈奴孝文即位

與通市

十



四年匈奴入朝那蕭關

史記十四年冬攻朝那塞括地志塞即蕭關今名龍山關在原

州百泉縣西

景帝復通關市孝武元封元年天子勒兵見武

節是時西置酒泉隔絕胡與羌通之路西通月氏大夏

以翁主妻烏孫分匈奴西方之援又北益廣田至眩雷

為塞匈奴不敢以為言

注服虔曰眩雷地在烏孫北

西南夷莊蹻

王滇漢興皆棄此國而關蜀故徼

注師古曰西南之徼猶北方塞也

南粵王趙佗移檄告橫浦陽山湟谿關時秦高后時有司

請禁粵關市鐵器武帝時上書請比內諸侯三歲壹朝

除邊關天子許之 西域武帝詔曰今邊塞未正關出

不禁 地理志弘農郡陸渾有關上黨郡有上黨關壺

口關石研關天井關漢中郡長利有鄧關越雋郡靈關

道

水經注靈道縣一名靈關漢制夷狄曰道

牂柯郡有柱蒲關進桑有關

敦煌郡龍勒有陽關玉門關西河郡增山有道西出眩

雷塞

眩音州縣之縣

朔方郡窳渾有道西北出難鹿塞代郡有

五原關常山關上谷郡居庸有關鬱林郡雍難有關蒼

梧郡有離水關謝沐縣有關荔浦有荔平關合浦郡合

浦有關九真郡有界關宛西通武關 光武紀建武十

五年二月徙鴈門代郡上谷民置常山關代郡居庸關上谷

以東徙吏人六萬餘口是時率馬成馬武北擊匈奴 章紀元和二年三月乙

未幸河東北登太行山至天井關注在今澤州晉城縣南 後傳

鄧禹建武元年正月自箕關將入河東箕關在今王屋東 馮

異北攻天井關拔上黨兩城注天井關在太行山下 異遣鄧曄于

康擊延岑岑自武關走南陽 樊崇逢安自武關徐宣

等從陸渾關兩道俱入注武關在今商州上洛縣東河

圖括地象曰武關山為地門上

為天齊星陸渾縣有關  
在今洛州伊闕縣西南

吳漢率岑彭等伐公孫述岑

彭破荆門長驅入江關

舊在赤甲城後移在江南岸對白帝城故基在今魚復縣南

王梁為野王令北守天井關為中郎將北守箕關

張禹祖父况光武以為常山關長

注關縣屬常山郡今定州行唐縣西北有

故關  
邑城

梁懂永初二年春羌寇三輔擊之轉戰武功美

陽關

注美陽故城在武功縣北七里於其所置關

袁尚敗高幹復舉兵守

壺口關

注潞州上黨縣有壺山口因其險面置關焉

烏桓為寇建武二十

一年遣伏波將軍馬援將三千騎出五原關掩擊之

注關

在代

鮮卑元初五年冬入上谷攻居庸關 郡國志

泰山郡鉅平有陽關亭南陽郡析縣有武關在縣西

注南

都賦曰武關在其西

巴郡魚復扞水有扞關

史記曰楚肅王為扞關以拒蜀

史

記貨殖傳南陽西通武關鄖關 賈誼新書所為建武

關函谷臨晉關者大抵為備山東諸侯也今大諸侯多

其力因建關而備之豈若定地勢使無可備之患

傳匈奴

應曰自中國尚建關梁以制諸侯所以絕臣下之覬欲也

列女傳海關有關侯士

史 蜀志先主次于陽平關與淵卻等相距法正曰魚

復與關頭實為益州福禍之門魏延欲請精兵萬人與諸葛亮異道會于潼關亮制而不許通典漢中褒城漢褒中縣有漢陽平關在縣西北蜀先主破魏軍於此

古今注秦築長城土色皆紫漢塞亦然故稱紫塞

關都尉箴漢潰武關項破函谷尉臣司關敢告並穀

崔瑗

潘岳關中記曰秦西以隴關為限東以函谷為界二

關之間是為關中此說未盡顏師古曰自函谷關以西

總名關中

高紀注

徐廣注項羽關塞之語曰東函谷南武

關西散關北蕭關其說是也他如大震在隴州瓦亭在  
原州駱谷在盤屋子午在長安同之蒲津洋之華陽雖  
建置在秦後其設險守國一也

漢函谷關 關都尉 關傳

紀高祖元年冬十月沛公至霸上十一月或說沛公急

守函谷關從之

注文頡曰是時關在弘農郡弘農縣  
嶺今移東在河南穀城縣師古曰今桃

林縣有洪溜澗水即古函谷也其水北流入河夾河之  
岸尚有舊關餘迹穀城即新安或云山形如函故稱

函谷關中客一車秦地西有龍關東有函谷臨晉南有  
峽武關北有蕭居庸天井關以臨胡庭故為關中漢興

都之左氏傳桃林之塞注桃林在弘農華陰縣東潼關史記楚懷王攻函谷關正義古函谷關在陝州桃

林縣西南十二里今屬靈寶縣文帝十二年三月除關無用傳傳符景

帝四年春復置諸關用傳出入文帝去關禁當時矯偽者乘傳行郡國景帝懲

復七國之變武帝元鼎三年丁卯冬徙函谷關於新安徐

云新安以故關為弘農縣注時接船將軍楊僕有大功東界

以家財給其用度帝意亦好廣濶於是徙關於新安去弘農三百里至今謂之新關代王傳元鼎中漢廣關

以常山為阻徙代王義於清河注依山以為關史平準書益廣關置左右輔水經注楊僕請以家僮七百

人築塞後李恂傳徙居新安關天漢二年冬十一月下注元鼎三年徙函谷關於新安



詔關都尉曰今豪傑多遠交羣盜其謹察出入者

崔子玉有

關都尉箴李尤賦曰命尉臣以執鑰統羣類之所從

關都尉傳王元曰請以一丸泥東封函谷關

西京

賦關門反拒

宣帝本始四年春正月詔載穀入關者得

毋用傳

終軍傳詣博士步入關吏予繻曰傳還當以成

帝陽朔二年秋關東大水流民欲入函谷天井

上黨壺口

壺關五原關

代者勿苛留

三輔舊事曰西以散關為限東以函谷為界二關之中謂之關

中高紀師古注自函

地理志秦地其界自弘農故

關以西弘農故秦函谷關

古孟谷關老子西遊關令尹喜先見其氣知真人當過秦關法難鳴

出客益膏君夜半至關其客效雞鳴  
得出九國仰關攻秦秦人開關延敵

五行志函谷

關距山東之險

元延元年門壯飛云云

百官表關都尉秦官

偽察

遊用傳出入張敞杜業寧成尹齊辛遵陰識為之

後紀光武建武十九年復

置函谷關都尉

注九年省今復置杜篤論都賦建武十八年二月甲辰循四岳入函谷三月

丁酉行至長安四月反于洛都明年有詔復函谷關云云山東翕然狐疑意聖明之西都懼關門之反拒也

章帝元和二年冬十一月壬辰日南至初閉關梁桓帝

永興二年冬十一月甲辰校獵上林苑遂至函谷關

郡國志弘農故秦函谷關

華陰縣注有潼關

河南穀城有函谷

關

注西征記曰函谷左右絕岸十丈中容車而已

王霸傳霸為討虜將軍建

武八年屯函谷關擊滎陽中牟賊平之 通典魏正

始元年弘農太守孟康上言移函谷關更號大嶠關又

為金關 論都賦阨塞四臨西被隴蜀南通漢中北據

谷口東阻嶽巖關函守峽山東道窮置列汧隴靡偃西

戎拒守褒斜嶺南不通杜口絕津朔方無從城池百尺

阨塞要害關梁之險多所衿帶一卒舉礮千夫沈滯

函谷關賦

李尤

上羅三關下列九門南有蒼梧荔蒲離水

謝沐涯浦零中以窮海陸北有蕭居天井壺口石陁貫

越代朔以臨胡庭緣邊邪指陽會玉門西有隨隴武夷

白水江靈沔漢阻曲路由山泉衆關莫盛於函谷銘云

函谷險要襟帶喉咽尹從李老留作二篇孟嘗讐秦謫

以雞鳴

文選注引李尤函谷關銘

西京賦左有崤函重險桃林之

塞綴以二華東京賦函谷擊柝於東西東都賦識

函谷之可關不知王者之無外晉江統賦帶以河洛

重以崤阻撫四夷而守境豈恃阻於高岑獨孤及古

函谷關銘序曰天作崤函俾屏京室崇山迴合長河屈  
盤崖奔嶺蹙谷抱谿關崖起重險為秦東門截函夏於  
閭闕鏖天府於戶牖江返秦壁天佑漢祚設險守國作  
藩于京 壺口嵯阨函谷批難 閭伯璵函谷關賦南  
據二號北荒三晉洞開一軌壁立千仞實隄防之樞轄  
為造化之緘滕建瓴百二之國扼喉三七之路幅員既  
長城小而固

漢玉門關 陽關 兩關

西域傳西域以孝武時始通東接漢院以玉門陽關西

則限以葱嶺元狩間張騫始開西域之道其後降渾邪

休屠王置酒泉武威張掖敦煌列四郡據兩關

注孟康曰關皆

在敦煌西界贊曰孝武表河曲列四郡開玉門通西域以斷

匈奴右臂

光武閉玉門關謝西域之質

李廣利傳天子使使遮玉門

關曰軍有敢入斬之貳師恐

西域傳漢軍正任文將兵屯玉門關為貳師後距

張騫傳酒泉列亭鄣至玉門地理志酒泉太初元年

開有玉門縣

注師古曰關駟云漢罷玉門關屯徙其人於此

武威故休屠地太

初四年開張掖昆邪地太初四年開敦煌後元年分酒

泉置正西關外有白龍堆沙蒲昌海龍勒縣縣有陽關

玉門關

常昭曰玉門關在龍勒界

皆都尉治

楊雄傳東南一尉西北一候注孟康曰敦煌玉

門關候也

後西羌傳武帝通道玉門隔絕羌胡使南北不

得交關於是障塞亭燧出長城外數千里後西域傳

自敦煌西出玉門陽關涉鄯善北通伊吾千餘里延光

二年北匈奴與車師入寇河西議者因欲閉玉門陽關

張璠上書陳三策

注玉門陽關二關名也在敦煌西界

陽嘉四年春北匈

奴侵後部乃令玉門關候伊吾司馬救之甘英拒玉門

陽關四萬餘里靡不周盡

前傳元始中車師後王國有新道出五船北通玉門關往

來差近戌已校尉徐普欲開以省道里半避白龍堆之阨

班超傳永元十二年上疏

願生入玉門關元初六年後數月北單于與車師後部

共攻沒索班公卿多以為宜閉玉門關輿地廣記沙

州壽昌縣本龍勒陽關在縣西六里玉門關在西北一

百十八里二關之西三百餘里有蒲昌海一名鹽澤廣

袤三四百里則蔥嶺于闐兩河所注也



漢遮虜障

地理志張掖郡居延澤在東北古文以為流沙都尉治師古注曰闕駟云武帝使伏波將軍路博德築遮虜障於居延城 武紀元狩二年夏將軍去病公孫敖出北地二千餘里過居延太初三年夏四月强弩都尉路博德築居延天漢二年夏五月騎都尉李陵將步兵五千人出居延北注師古曰居延匈奴中地名韋昭以為張掖縣失之張掖所置居延縣以安處所獲居延人

而置此縣 李陵傳天漢二年詔陵以九月發出遮虜

鄣注師古曰鄣者塞上險要之處往往修築別置候望  
之人所以自鄣蔽而伺敵也 河西之未入漢也霍去

病欲攻小月氏則先望居延而濟乃至天山李陵欲涉

單于庭必先自居延北出乃至浚稽則知居延之出匈

奴乃其要路也漢既全得月氏之地立為四郡則居延

又為酒泉要路故築鄣其上以扼其來名以遮虜可見

其實也通典既於張掖甘州著居延塞又於酒泉肅州

著遮虜障者甘州之西即肅州之東虜之來路亘乎兩

州之境故障塞之設亦亘兩境

李陵之軍自遮虜障北出亦望遮虜障南入可

見虜路出入無不由此也  
居延塞即遮虜障也

### 漢散關 白水關

後漢書延岑引北入散關注在陳倉縣南十里有散谷

水 李固傳出為廣漢雒令至白水關

一作關

解印綬還

漢中注梁州記曰關城西南百八十里有白水關李固

解印綬處也故關城今在梁州金牛縣西 隗囂傳白

水險阻棧閣絕敗 三國志建興六年冬諸葛亮引兵

出散關圍陳倉 蜀志注典畧曰起館舍築亭障從成

都至白水關四百餘區烈昭 抱朴子老子西遊遇關令

尹喜於散關 括地志在岐州陳倉東南五十二里 通典金牛縣南有故

白水關

### 漢洛陽四關

文選鮑昭樂府升高臨四關注陸士衡洛陽記漢洛陽

四關東成臯關南伊闕關西函谷關北孟津關 初學記同

云南有轅  
轅伊關

東京賦盟津達其後大谷通其前廻行道

乎伊關邪徑捷乎轅轅 郡國志河南郡穀城有函谷

關緱氏有轅轅關 光武紀贊四關重擾注謂長安四

塞之國 通典後漢置成臯關

漢三關

馮衍傳衍遺田邑書曰上黨有四塞之固東帶三關西

為國蔽注三關謂上黨壺口石陘也

漢八關

靈帝紀中平元年三月戊申置八關都尉官注謂函谷  
廣成伊闕大谷轅轅旋門小平津孟津也 通典河南  
壽安縣有後漢八關城在縣東北函谷關都尉所理

蜀漢三關

文選晉紀論三關電埽注吳志賀邵曰劉氏據三關之  
險守重山之固張瑩漢南記曰蜀有陽平關江關白水  
關此為三關

吳三關

吳志朱然傳曹公出濡須然備大塢及三關屯

魏義陽三關

北史元魏郢州司馬彭珍等叛魏潛引梁兵趨義陽三

關

唐中州今信陽軍

魏中山王英出汝南救之英至義陽將取

三關先策之曰三關相須如左右手若克一關兩關不待攻而破宜先攻東關又向西關以分其兵勢

隋榆關

文帝紀開皇三年三月癸亥城榆關四年四月丁巳以

賀婁子幹為榆關總管

秦有榆中關漢有榆溪舊塞廣長榆塞名史記正義曰今榆木

塞也在勝州北王恢所謂植榆為塞也顏師古曰在朔方或謂之榆中

地理志榆林郡

開皇二十年置勝州仁壽二年置金河縣帶關 史記

蒙恬為秦將北逐戎人開榆中地數千里

即今之榆林古上郡界

始皇三十六年徙民三萬家於北河榆中

漢傳枚乘說吳王曰秦北備榆

中之關

師古曰即今所謂榆關

南距羌笮之塞

唐志勝州榆林

縣東有榆林關貞觀十三年置 水經注榆中在金城

東五十許里



唐二十六關 七關 天下關

百官志司門郎中掌門關出入之籍天下關二十六有

上中下之差

京城四面關有驛道者為上餘關有驛道及四面關無者為中餘為下 有上中下

關令掌禁未遊察者即月司關漢關都尉之職

六典司門郎中凡關二十

有六

通典關二十七

為上中下之差上關六

京兆藍田華州潼同州蒲津岐州散

隴州大震 中關一十三

京兆子午駱谷庫谷同州龍門

會州會寧原州木峽石州孟門

嵐州合河雅州邛崃彭州盤 下關七

京州甘泉百牢河州鳳林利州石門

延州永和綿州 以限中外隔華夷設險作固閑邪止暴

松嶺龍州涪水

紀長安二年十二月丙戌天下置關三十

今攷地理志凡十道有關一百四十三關內三十一京

兆之藍田

故峽關日休有銘

庫谷大橫華之潼

會要武德九年八月十七

日詔停潼關已東緣河諸關天授二年七月九日省潼關置洛州南北面關建中二年正月二十五日潼關依

舊置防禦使郭子儀傳攻賊崔乾祐於潼關乾祐敗退保蒲津趙復等放闕內軍進收永豐倉關陝始通太宗

有入潼關詩嶠函稱地險襟帶壯兩京渭津同之龍門

商之武關鳳翔之大散駱谷

元和志駱谷關在藍屋縣西南北二十里武德七年

開駱谷道隴之安戎

本大震大中六年防禦使薛遠徙築更名安戎會要大中六年正

月二十六日詔隴州薛遠移築故關三月奏移要會之中臨水挾山當川限谷危墻深塹克揚營壘之勢乞改為定戎關又南由路舊有水關正月二十七日功三月十七日畢盡圖進上勅云新置關成得其要害安

夷原之水峽石門驛藏制勝石峽水磧并渭州六盤南

隴山為七關乾元後失七關紀宣宗大中三年二月吐蕃以秦原安樂三州石門驛藏木峽制勝六

盤石峽蕭七關歸于有司裴識傳尚恐熱上三州七關吐蕃傳康季榮復原州取石門等六關張欽緒復

蕭關詔三州七關地又有瓦亭故關太宗紀貞觀二

次瓦亭蕭關大中五年以蕭關置武州會要大中三年六月二十七日涇州節度使康季

觀馬牧蕭關三年六月二十七日涇州節度使康季

榮收原州城及諸關七月十三日邠寧軍收蕭關括地志隴山關在原州即古蕭關漢文帝十四年匈奴

入朝那蕭關開在安定朝那縣武帝元封四年十月辛  
雍祠五時通回中道遂北出蕭關歷獨鹿鳴澤回中在

安定高平蕭寧之定安故丹之烏仁延之合嶺蘆子會  
關在其北

之會寧烏蘭綏之魏平勝之榆林貞觀十三年置河濱貞觀七

豐之中受降城元和九年單于府之雲伽後廢太和四  
五月置

畢功時李泳為振武節度進圖以兵千人守之河南十  
開成五年詔振武節度劉沔屯雲迦關備回鶻

五張知泰傳武后時奏置東都諸關十七所幾欲出入  
崔融傳時有司議關市盡征之融謂周官九賦其

七日關市雖欽士商不及往來河南之河陽轅轅陸渾  
天下之關必險道或致騷動

伊關皆故高門松陽鵜鵠大谷松陽已汝之魯山漢故  
關

陝之大陽

故關即茅津

古函谷

天寶元年獲寶符于關更桃林縣名靈寶

涇津

義寧

元年置開貞觀元年廢開置

號之潼大谷

武德二年廢

鳳陵

貞觀元年廢

朱陽

武德八年廢

鄆之碣磻津

故關

齊之鹿角

故關

濮之靈津沂之穆

陵

元和十二年二月李道古引兵出穆陵關

河東三十三河中之風陵

聖歷元年

置蒲津

一名蒲坂

龍門晉之府城絳之武平

故關

太平

貞觀七年置

隰之馬鬬永和太原之白馬

故關

井陘盤石葦澤

皆故關

赤

塘天門汾之陰地長寧沁之柴店嵐之樓煩合河蔚汾

憲之鴈門

劉沔傳會昌二年拜河東節度兼招撫回鶻使進屯鴈門關

石之孟門忻

之石嶺代之東陘西陘石門雲之牛皮蔚之孔嶺潞之

井谷壺口

故關

昂車澤之天井

一名太行年討澤潞十二月丁巳王

通鑑會昌三

宰克天井關甲戌河東奏克石會關

長平河北二十四孟之河陽虎牢成

臯旋門

故關

故軹懷之大斛

故關

博之四口

故關

衛之故延津

故臨清黎陽

一名白馬津

澶之盧津

一名高陵津

鎮之白馬故井

陘

一名土門出兵井陘與李光弼合

郭子儀傳德之張公

故關

定之安陽

故關

八

度倒馬委粟

故關

幽之納款

在昌平縣西北三十五里即居庸故關亦謂之軍都關

即

通典北齊改爲納款

平之明堙臨渝

一名臨間九年班師十月丙辰皇太子

太宗紀貞觀十

迎賜于臨渝關

大海媯之居庸塞

東連盧龍碣石西屬太行常山實天下之險

通典注漢

居庸關在

鐵門

志自馬者西五十里過鐵門關

山南五鄧之魯陽興元

之甘寧

通典作甘亭隋置

百牢

通典隋置關今名百牢關

利之石門興之興

城隴右六秦之大震河之河藍鳳林

吐蕃傳尚延心獻欵高駢收鳳林關

蘭之金城

關駟十三州記金城關

沙之陽關玉門

壽昌縣治漢龍勒城

西有陽關西北有玉門關

郭元振傳旌節下

淮南十

二廬之故東光之本陵定城

二故關

安之故黃峴武陽百

鴈平靖

四開

黃之大活白沙木陵陰山申之故平靖江南

一虔之橫浦劔南十二彭之靜塞蠶崖漢之鹿頭嘉之

平羌窩之青溪

太和中節度李德裕徙於中城西南有昆明軍西有寧遠軍有九城自青溪關

南經大定城百一十里至臺登

貞元十四年內侍劉希昂使南詔由此李德裕傳韋臯鑿青溪道和羣蠻

韋臯傳蹂黎州出邛部直雲南置青溪關號曰南道

瀘津雅之靈關雞棟邛峽

邛峽山有金湯軍靜寇軍乾符二年置李德裕奏復邛峽關

茂之古桃綿之松嶺龍

之涪水嶺南四廣之涯浦

故關

賀之荔平連之故秦湟溪

容之鬼門

兩石相對中澗三十步

羈縻莊州之桂嶺

本隋牂柯郡地南百里有

桂嶺關

呂氏春秋山有九塞大汾冥阯荆阮方城穀井



陘令疵句注居庸 志安西西出拓厥關

唐虎牢關

紀會昌五年十月作昭武廟于虎牢關

孟州汜水太宗破世充建德之地

志汜水東南有成皋故關西南有拔門故關  
乾元元年李光弼謂賊方關洛當扼虎牢

通典河

南府汜水有故虎牢城東魏武定中陸子章增築後漢

置成臯關 賈至虎牢關銘序曰漢祖守之以臨山東

坐清三齊強楚躑躅而不進太宗據之以拒河朔克平

醜夏僞鄭袒縛而請命維茲虎牢天設巨防功在坤下

拒在離旁昏恃以滅聖憑而王 呂溫成臯銘洪河在  
下太室傍倚岡盤嶺蹙虎伏龍起鎖天中區控地四鄙  
出必由戶入皆同軌拒昏納明閉亂開理劉項分險扼  
喉而爭漢飛鎬京羽斬東城維唐初興時未大同王于  
東征烈火順風乘高建瓴擒建系充周道如砥成臯不  
關順至則平逆來惟難 柳宗元饒歌戰武牢云云

左傳制嚴邑也

古東虢國

王與鄭武公之畧自虎牢以東襄

二年諸侯城虎牢十年戊虎牢 漢志河南郡成臯故

虎牢或曰制注師古曰穆天子傳云七萃之士主捕獸  
天子蓄之東號號曰虎牢 韓取鄭從成臯始

唐大和關

王思禮傳賊分兵畧大和關去鳳翔五十里命郭子儀  
以朔方兵擊之 太宗紀武德九年八月甲子即位廢  
潼關以東瀕河諸關 路巖傳置定邊軍於邛州柘大  
度治故關 故函關城後周保定中改名道洛防

在新安縣

東

唐四面關

百官志御史臺凡出不踰四面關則不辭見

咸平平安關 太平興國高陽關 熙寧通會

關 紹聖金城關

會要京西有關二房州平安關 咸平五年置在房陵縣 行慶關 見後

河北有關一瀛州高陽關 舊號關南興國七年二月甲申改 陝西有關

十環慶龍平關 元符二年置 涇原渭州制勝關 熙寧中慶 熙州南

北關 熙寧五年置 河州通會關 熙寧十年置三月築丙子賜名通會

蘭州鞏哥關

元豐四年置六年改東關堡

金城關

紹聖四年四月十一日置

會州

會寧關

元符元年五月以巔耳關置

京玉關

元符三年置

安鄉關

三年置

綏

遠關

崇寧三年以洒金坪改三關並隸熙河

成都路有關一茂州難宗關

熙寧九年置

周世宗復三關

顯德六年三月甲戌北征四月壬辰取乾寧軍辛丑

取益津關為霸州癸卯取瓦橋關為雄州及淤口關上置塞今信安軍是也五月乙巳朔取瀛州

### 景德劔門關

九域志利州路劔門關景德三年以劔州劔門縣隸關

以兵馬監押主之熙寧五年縣復隸劍州

祥符行慶關

河陽汜水縣舊關東題曰虎牢西題曰王關祥符四年

三月戊戌真宗西巡至虎牢關改行慶關

詔曰春王關之樞會控鼎

邑之要衝慶曆四年五月己丑省汜水縣為行慶關隸河南

府

康定潼關

元年二月丁亥詔潼關設備

宋庠請修治函谷關以備西羌

慶曆元年

八月乙未毀潼關新置樓櫓王堯臣陳不可乃詔徹之

慶厯秦州東西關

又見城類

二年正月二十七日秦州築東西關成初守臣韓琦以州之東西民居軍營皆附城因請築外城凡一十里自元年十月起至是成計工三百萬

段規曰一里之厚而動千里之權者地利也王者邦

畿守在四夷禮義干櫓道德藩籬遠人不服文德來之化既無外何以關為其間如礪其絕如斗千乘馳輪

匹夫可守



玉海卷二十四